

Şirawt ta iktab Buləs i Kəl-İrrum İsənti

Assalam

¹ Awa nak Buləs akli n Elməsix Ƴaysa, itiwaxran əs tişit n anammazul itiwaskat deƳ y igi ən salan n Elinjil ən Məşşina.

² Elinjil wen irəw Məşşina as iga arkawal-net y ənnəbitan daƳ Elkəttaban win zaddoggen.

³ Isalan n Elinjil win den əmmigradan daƳ batu ən Barar ən Məşşina a d-ihəwan daƳ əzzurrəyya n ənnəbi Dawəd daƳ batu ta təqqalat tişit-net aggadəm.

⁴ DaƳ batu amaran ta təqqalat Infas wa Zəddigan ən Məşşina itawaxsab Barar ən Məşşina əs tarna s əssəbab ən tanakra-net daƳ təmattant. Ənta a imosan Ƴaysa Elməsix Əməli-nana.

⁵ Tarrayt-net as nəgraw arraxmat ən tişit ən nəmmuzal fəl a du-nawəy şimattiwen kul şin wər nəmos Kəl-İlyəhud s əbərdəg wa d-itaway əzəgzan, fəl saƳmar n esəm-net.

⁶ Şimattiwen şin kawanay da təhəm-tanat, kawanay a iƳra Ƴaysa Elməsix.

⁷ Katabax-awan-in ketnawan kawanay a əhanen aƳrəm n İrrum təmosam win ikna Məşşina tara tət iwaxram s ad tizdagam. Əgmaya daƳ Məşşina di n Abba-nana d Əməli Ƴaysa Elməsix a dawan-igan arraxmat d alxer.

Igodan əd səsəgritan

⁸ Day tizarat əggodayax i Məššina əs tarrayt ən Ƴaysa Ělməsix day batu-nawan ketnawan id əzəgzan-nawan itiwasla day əddənet ketnet.

⁹ Iggiyyat-i Məššina a əxbada s əwəl iyyanda s amel wa taggay isalan n Ělinjil ən Barar-net əs faw tahâm šiwatriwen-in.

¹⁰ Faw da gammaya day təwatriwen-in ad əgrəwax təməwit n a kawan-in-asa, as irda Məššina.

¹¹ Tidət as əknex tara n a kawan-ənəya fəl a dər-wan ədrəwax arat ən təhəkkuten šiyyad a d-əfalnen Infas wa Zəddigan fəl ad təgrəwam əzəzzəwi day əzəgzan-nawan.

¹² Almayna as dər-wan namaggazax edag, əzəgzan wa nəla nak dər-wan a danax-isəssuhət ketnana day tarrayt ta nəha, inəməsəssuhət dey əzəgzan wa-nawan əd wa-nin.

¹³ Ya imədrayan-in, arex ad təssənam as əyyəwanax tara n a kawan-in-asa fəl ad əgrəwa xur-wan tənfa n əššəxəl-in wa n anammazul zun ta əgrəwa xur təmattiwen šin hadatnen wər nəmos Kəl-Ělyəhud. Mišan indar-i awen har harwa.

¹⁴ Tišit-in anammazul təsiwar-i əššəxəl day aytedan kul gər Kəl-Ělyunan as əmoranat šittawen-nasan wala win tan-wər-nəmos, gər win musanan wala win aljahilan.

¹⁵ Awen day a fəlas sidaranax wəllen a dawan-agax isalan n Ělinjil kawanay da a əhanen axrəm n Ěrrum.

Awa day təššewal širawt ta

¹⁶ Fəlas wər di-imos Əlinjil təkarakit id tarna ən Məşşina a imos, itaway-du efsan s aytedan kul win əzzəgzannen a obazan ğur Kəl-Əlyəhud ikka aytedan win tan-wər-nəmos.

¹⁷ Illikan as taqqat ta n Məşşina tənifalal dağ Əlinjil s əzəgzan, amaran s əzəgzan ğas, id ənnan Əlkəttaban: «Awedan wa oğadan dağ tarrayt ta n əzəgzan a igarrawan təməddurt təynayat.»

Əlinjil ənta immalan taqqat ən Məşşina

Aytedan kul ibaz-tan əşşəriğa ən Məşşina

Inəmməzray kul obâz-tan əşşəriğa ən Məşşina

¹⁸ Alham ən Məşşina iffal-du ijənnawan itakka-du aytedan kul win wər nəksud Məşşina d aytedan kul win wər noyed, əwâğan tidət əgdâlan-as ənəfilal s iba n taqqat-nasan.

¹⁹ Fəlas arat wa ifragan ətəwəssan dağ batu ən Məşşina ibbiyyan-asan id Məşşina iman-net a dasan-t-isannafalalan.

²⁰ Awalla, harwa ğur əxluk ən Məşşina əddənet da assayfaten-net şin wər nətəwənəy, əmosnen tarna-net təxlâlat əd tişit-net Əməli, tawahannaynat, əmmunnat dağ igitan-net. Dağ adi wər əlen əsaru waliyyan a tan-ikkasan,

²¹ id əssânan Məşşina mişan wər das-əgen saymar wa dər ihor za wər das-əgen igodan. Kalar oyyan iman-nasan əssəxrakan-tan medranan wər nənfa wala, əjawanken değ dağ şiyay id iwallan-nasan a əxfalnen.

²² Ʒgân iduf n as əmosan imalan ən tayttay, əntanay amaran imeskelan a əmosan.

²³ Ʒnkaran əs tanaya ən Məššina di n Amaylol əgan daɣ adag-net šaššelanan n aggadəm wər nəɣləl əd gədad əd hərwan əd wəxsan əd dəmərdəmaran.

²⁴ Awen daɣ a fəl tan-oyya Məššina əlkaman y arak deranan-nasan. Ʒmmək en daɣ as samadasan iman-nasan əs təməwit təsifallasat aggadəm.

²⁵ Ʒntanay a sammattaynen tidət ən Məššina əgan bahu daɣ adag-net, əɣbâdan əməttəwexlək oyyan Wa d-ixallakan. Attamalet esəm-net har faw! Amin!

²⁶ Awen daɣ a fəl tan-oyya Məššina əggâzan tara ən man-nasan eway-du sər-san awen šifəllas, har âs šidoden-nasan ab-as tinəmənsinat əd meddan, kalar šidoden a dər tinəmənsinat, imos awen arat immizrayan əttəbiɣat n aggadəm.

²⁷ Meddan deɣ əgan awen da. Ab-as tinəmənsin əd tədoden-nasan, ad tinəməggin əzzəna gar-essan, əknân tara n awen. Aytedan win əxraknen en, a tan-abəz əššəriɣa ən Məššina s attadib wa dər əhoran mazalan wər nətəwəggu win taggin den.

²⁸ Dad zamas ugayan s ad əssənan Məššina, oyy-en Məššina əlkaman y arak tayttay-nasan ad taggin imazalan wər nəmməkkan.

²⁹ Taggin əzzənəfan kul ən mazalan wər noɣed, d aššar, d attama daɣ a wər əlen, d əzzəngu əd manzaɣ, d igi ən man, əd kənnasan, əd təkərras, əd tišit ən maksanan. Sawaran aytedan bahu,

³⁰ akkiyyan igannu ark aratan əs wa hadan. Ēmosan izənga ən Məššina, wər əlen aladab, tanarbadan, ih-en zazwar ən man, gammayan tarrayen kul šin igi ən təkma. Wər əbbərdagan i marwan-nasan.

³¹ Wər əlen tayttay, wər əydelan, wər əlen tafreyt za wər tan-təha tahanint.

³² Ēknân masnat n əššərixa imosan tamattant təxlalat wa issənsa Məššina i win tagganen imazalan win den. Mišan dər iga awen da, əssərtayan as tamazalan ark aratan win den, d as əqbâlan aytedan win tan-tamazalnen.

2

Aytedan win əganen iduf n as olayan obaz-tan əššərixa ən Məššina

¹ Day adi kay wa ixakkaman y aytedan, əssən as wər dak-tu-təlla təsureft a təqqala da, fəlas as təkakkama y aytedan, wədi iman-nak a tətəbaza s əššərixa, id kay iman-nak da tətəggaç arak mazalan win taggin aytedan win den.

² Amaran nəssân as əššərixa ən Məššina was obaz aytedan win tagginen imazalan win den oçâd.

³ Ēnzər-in daç as kay wa ixakkaman aytedan a dər-ək olanen alxal, wər t-illa əmmək as du-za-tərəga daç əššərixa wa n Məššina.

⁴ Məç ak əsəttəlkək a təgeç əlluç ən Məššina, d əlləllu-net, əd təzaydart-net, təqqima wər din-təgreç as ira a kay-isəmməttəy s əlluç-net tutaba?

⁵ Ēqqəssu-nak əd tugəyt-nak əs tətubt a d-ewaynen as itiwəsəmutig-ak alçazab zəwwəran

əzəl wad z'izəmmizəl Məššina alham-net inəfiləl əššəriḡa-net oḡādan.

⁶ Ʒzəl wen, awedan kul ad t-akfu Məššina awa dər ahoran mazalan-net.

⁷ Win əganen təzaydart za daḡ əmazal n awa olaḡan, gammayan s awen ətəwəsəḡmər ḡur Məššina, d ədkul, gammayan təməddurt ta wər nəḡərrəd, win di ad tan-akfu Məššina təməddurt ta təḡlalat.

⁸ Amaran win wər nəḡəmmay ar tənfa ən man-nasan, əmosan əllid ən tidət, tamazalan deḡ aratan wər noḡed, win di a tan-assaknu Məššina aššar n alham-net.

⁹ Awalla, təssust əd təməḡutar əllānat-tu y aytedan win tamazalnen talbast a obazan ḡur Kəl-Īlyəhud ikka win wər nəmos Kəl-Īlyəhud.

¹⁰ Amaran awedan kul wa itamazalan awa olaḡan, wədi ill-as-tu ətkul d ətəwəsəḡmər d alxer a obazan ḡur Kəl-Īlyəhud ikka win wər nəmos Kəl-Īlyəhud,

¹¹ fəlas Məššina wər itəḡḡu təmərit.

¹² Adi a fəlas aytedan kul win tagginen ibakkadan imos as ijhal-asan əššəriḡa wa n Ʒttawret, win di wər z'attarmasan s əššəriḡa wen. Amaran win əssannen əššəriḡa wa n Ʒttawret taggin ibakkadan, win di ketnasan a dasan-itəwəḡkəm s əššəriḡa wədi da.

¹³ Wərgəḡ win sasammen y əššəriḡa a oḡadnen dat Məššina, kalar win sər-əs tamazalnen əntanay a z'əgrəwnen ətəwəqbal əd taqqat ḡur Məššina.

¹⁴ Aytedan win wər nəmos Kəl-Īlyəhud amaran wər əssenən fəl əššəriḡa wa n Ʒttawret

mišan imazalan win əttəbiyat-nasan niman-nakan d əşşərixa wa, win di əntanay a əmosnen əşşərixa i man-nasan.

¹⁵ Saknin s awen as imazalan win as omar əşşərixa əktâban dağ wallan-nasan. Ənnəyatennasan değ tagayyatnat awen. Amaran iduf wa namaggan gar-essan assaxat iyyat tinəməsəwiran sər-əs lahan assaxat iyyat değ gammayan sər-əs ənəməsurağ.

¹⁶ Ənta da da awa z'agin əzəl wad z'işrəğ Məşşina əs tarrayt ən Ƴaysa Əlməsix imazalan n aggadəm win əğbarnen, s əmmək was t-inna Əlinjil wa əmmala.

Kəl-Əlyəhud obâz-tan əşşərixa ən Məşşina

¹⁷ Kay wa igannin təmosağ Ag Əlyəhud təffilla fəl əşşərixa wa n Əttawret, tətəggağ ibaragan as kay təmosağ əmaray əs Məşşina,

¹⁸ təssânağ awa ira Məşşina, təssânağ arat wa imosan əlməxsud id tətivasasaxra əşşərixa wen.

¹⁹ Kay wa ikkasan aşşak as təmosağ əmalway ən win əddəğalnen, təmosağ ənnur i win əhanen şiyay,

²⁰ təmosağ əməsəsəğri n aytedan win nəbbənnan, d əməsəsəğri ən bararan, təğêğ awen fəlas tənâya dağ Əttawret masnat əd tidət əkmâlnen.

²¹ Xasil kay wa isasağrin aytedan amaran wər təsəsəğrağ iman-nak! Kay wa itamaran aytedan s ad wər akəran, mafel tətakara?

²² Kay wa itamaran aytedan s ad wər agin əzzəna, mafel tətəggağ-qu? Kay wa ikəyağan

əssənəman, mafel təgalla tətakarax awa ihan idaggan n əlxibada-nasan?

²³ Kay wa isabaragan fəl əşşərixa n Əttawret amaran tətamazrayaq-qu imos awen iba n safrar n esəm ən Məşşina.

²⁴ «*Fəlas esəm ən Məşşina sammadrayan-tu aytedan win wər nəmos Kəl-Əlyəhud amaran imazalan-nawan a d-ewaynen awen*», s əmmək was t-əmalan Əlkəttaban.

²⁵ İllikan as əmənəkəd təh-ay tənfa as imos as təbbirdaga y əşşərixa wa n Əttawret, mişan as tətamazrayax əşşərixa wen, wədi əmənəkəd-nak wər izlay d iba-net.

²⁶ As imos as awedan wa wər nəmmənəkəd ilkâm y alwajiban n əşşərixa ibbirdag-asan, awak wərgex a das-itəwəxsəb as imminkad?

²⁷ Awedan wa wər nəmmənəkəd amaran ib-birdag y əşşərixa wa n Əttawret, ənta dak-z-İsrəxan kay wa ittafan Əttawret təmminkada tətamazrayaq-qu.

²⁸ Arat wa imosan tidət as tişit n Ag Əlyəhud wər təmos arat iwaran azzahir xas, wala əmənəkəd xas.

²⁹ Kalar awa ihan əwəl ənta a itaggin awedan Ag Əlyəhud amaran əmənəkəd wa itaggin awedan Ag Əlyəhud əwəl a day itaggu imos arat a d-ifalan İnfəs ən Məşşina, wərgex arat iktaban xas day Əttawret. Ənta di da Ag Əlyəhud wa igarrawan təmmalen şin d-əfalnen Məşşina, wərgex şin d-əfalnen aggadəm.

3

¹ Day adi məni tat alfoydat ən tişit n Ag

Əlyəhud, madey məni tənfa n əmənəkəd?

² Tənfa-net ši agget day anamod kul, amaran ta zəwwərat âs Kəl-Əlyəhud əntanay as d-iga Məşşina awal-net day fassan-nasan.

³ Tidət as wiyyad day-san əmmizrayan Məşşina. Awak immikkan iba n təlɣudəlanasan ad təsəmməttəy arat day təlɣudəla ən Məşşina?

⁴ Kala kala! Itəwəqbəlet as Məşşina ənta a imosan tidət, aggadəm anasbahu. Tişit ən Məşşina tidət ənta a fəl ənnan Əlkəttaban: «*Təgrawa taqqat day awal-nak, təgrawa tidət day əşşəriya-nak.*»

⁵ Mişan ma za nannu as imos as iba n aqqad-nana isannafalal-du aqqad ən Məşşina? Awak Məşşina imos fall-as iba n aqqad ad izəmmizəl alham-net? Illikan as awal wa tagga da taggaq-qu əs tayttay ta n aggadəm.

⁶ Kala, kala! Məşşina inimaggag d ad imos as wər oɣed. Kundaba adi, manəmmək as z'îşrəɣ y əddənet?

⁷ Amaran as imos aş bahu-nin isannahal əsənəfiləl ən tidət ən Məşşina, eway-du awen əs təbbəyyan tanaya-net, wədi mafel tətawaxkam-i tişit n anasbakkad?

⁸ Ma ikma fadda nənna: «Mazalatana talbast fəl a tat-du-təgmad tənfa?» Arat s ənta a sərna gannin arat n aytedan gammaynen a danaɣ-əɣşədan esəm. Aytedan win di əhoran d ad attarmasan s əşşəriya ən Məşşina.

Aytedan kul obâz-tan əşşəriya ən Məşşina

⁹ Ma za? Awak nakkanay an Kəl-Əlyəhud təllay alfaydat nəgrâw dənneɣ aytedan harwa da?

Kala kala, fəlas nəjwər nəsattda as ketnana
gər za Kəl-İlyəhud wala aytedan win tan-wər-
nəmos, as nəha təla n abakkad,

¹⁰ s əmmək was ənnan İlkəttaban:
«Wər t-illa i oğadan, wala ɣas iyyanda,

¹¹ wər t-illa i igarrin,

wər t-illa i igammayan masnat ən Məşşina

¹² Kul əxrâkan əmmək a mosan,

ketnasan əknân aşşar,

wər tan-iha i itaggan awa olaɣan,

[wala] ɣas iyyanda.

¹³ Şigarsaten-nasan əmosnat zun təsəska
ənnolamnen,

ilsawan-nasan takarrasan sər-san aytedan,

idəlay-nasan wər əɣberan ar assam ən taşşolt.

¹⁴ Imawan-nasan ədnâyan batuten samomnen
əd tulɣant,

¹⁵ idaran-nasan təh-en tadasayt ən tanaɣla n
əzni,

¹⁶ ahluk d əlməssibat əwâran tarrayt-nasan,

¹⁷ wər əzdayan tarrayt ta n alxer.

¹⁸ Təksəda ən Məşşina wər təha wallan-nasan.»

¹⁹ Ənta nəssân as arat kul wa inna əşşəriɣa wa
n Əttawret, inn-ay y aytedan win əllanen daw
əlxəkum wa n Əttawret fəl ad affastin məwan
kul itəwəqbəl as əddənet kul obâz-tat əşşəriɣa
wa n Məşşina.

²⁰ Fəlas wər t-illa awedan as za tətəwəqbəl
taqqat-net dat Məşşina əs tarrayt ən mazal n
awa ihan əşşəriɣa, fəlas əşşəriɣa ənta a danaɣ-
isusunan awa imos abakkad.

Aytedan əgrâwan taqqat əs tarrayt n əzəgzan

İsəssəgri ən taqqat ta ihakku əzəgzan

21 Mišan əmərədda, Məşşina isinafalal əmmək was z'iqbəl taqqat-nanaɣ da wala tarrayt ta n Əşşəriɣa ittiddan daɣ Əlkəttaban.

22 Məşşina iqabbal taqqat əs tarrayt n əzəgzan əs Ƴaysa Əlməsix. Amaran aytedan win əzzəgzannen kul iqabbal taqqat-nasan, fəlas aytedan wər əzlayan:

23 Ketnasan əgân ibakkadan aba fall-asan tanaya ən Məşşina.

24 Amaran əgrâwan taqqat təmosat təhəkkut n arraxmat ən Məşşina əs tarrayt ən tədarfit ta du-teway tassaɣ d Əlməsix Ƴaysa.

25 Ənta a d-issəgla Məşşina ixkâm-as ad iqqəl takutay ta təmmasat ibakkadan n aytedan əs tarrayt n əzəgzan s əzni-net. Əmmək en daɣ as issəkna Məşşina taqqat-net. Fəlas Məşşina oyya ibakkadan da wər tan-iwwəddab daɣ azzaman win ərəwnen,

26 ən təzaydart-net, amaran azzaman win əmərədda, ira ad assaknu taqqat-net əs təməwit a daɣ z'itəwəqbəl as oɣâd, fəl ad iqbəl taqqat n awedan kul wa izzəgzanan əs Ƴaysa.

27 Daɣ adi, awak ill-ay əddəlil a fəl nəga ibaragan? Kala wər t-illa, fəlas wərgəɣ əbərdəg y əşşəriɣa a işxalan əmərədda, kalar əzəgzan.

28 Fəlas nakkanay nəga iduf n as awedan igarraw taqqat əs tarrayt n əzəgzan, wərgəɣ ləkkum y əşşəriɣa.

29 Məɣ ak nəga iduf n as Məşşina Kəl-Əlyəhud ɣas as imos Əməli-nasan? Awak Məşşina wər imos Əməli n aytedan win wər nəmos Kəl-Əlyəhud? Awalla Əməli n aytedan kul a imos, harkid win wər nəmos Kəl-Əlyəhud.

³⁰ Dad zamas Məşşina iyyanda ƣas, wədi ad iqbəl taqqat ən Kəl-İlyəhud s əssəbab n əzəgzan, iqbəl deƣ taqqat ən win wər nəmos Kəl-İlyəhud əs tarrayt n əzəgzan wa.

³¹ Daƣ adi wərgəƣ emes a din-nətaggu əşşəriƣa nətaggu əzəgzan daƣ adag-net. Kalar əsəttəddi a nətaggu əşşəriƣa.

4

Ibrahim imos almasal n agaraw ən taqqat s əzəgzan

¹ Ma za nannu daƣ adi s Ibrahim imosan əmâraw-nanaƣ daƣ batu ta təqqalat tişit n aggadəm? Ma igraw?

² Ənnar imos as Ibrahim tarrayt ən mazalan-net as igraw taqqat ƣur Məşşina, wədi ila əddəlil n igi ən baragan. Mişan wərgəƣ awen a igan ƣur Məşşina.

³ Fəlas ənnan İlkəttaban: *Izzəgzan Abram əs Məşşina, awen daƣ a fəl t-ikfa Məşşina taqqat.*

⁴ Awedan wa itaggan imazalan olaƣnen, wədi alak-net wər das-imos tənəfust, kalar alxaq-net a imos.

⁵ Awedan amaran wa wər nəƣa imazalan olaƣnen, mişan izzigzan əs Məşşina s ənta ihakkin taqqat i nasbakkadan, wədi ad igrəw taqqat s əssəbab n əzəgzan-net.

⁶ Əmmək en daƣ as inna ənnəbi Dawəd daƣ batu n əbbələl n awedan wa ikfa Məşşina taqqat da wala imazalan-net, inna:

⁷ «Əbbilalan win as tawasarafan arak mazalan-nasan,

Tawamasan bakkadan-nasan!

8 İbbilal aləs wa fəl wər ixəssəb Məşşina ibakkadan-net!»

9 Awak əbbələl wa in Kəl-İlyəhud ɣas, meɣ ak in aytedan kul harkid win wər nəmos Kəl-İlyəhud? Fəlas nəgannu: *Əzəgzan n İbrahim igraw sər-əs taqqat dat Məşşina.*

10 Awak ma dər ola İbrahim as igraw ətəwəqbal wen ɣur Məşşina? Awak imminkad meɣ wər immənkad harwa? Kalar harwa da dat əmənəkəd-net ad igraw ətəwəqbal wen.

11 Dəffər awen ad igraw İbrahim ɣur Məşşina asannal wa n əmənəkəd imosan əsətəddi ən taqqat ta igraw s əzəgzan harwa dat əmənəkəd-net. Arat wen igâ fəl ad iqqəl İbrahim əmâraw n aytedan kul win əzzəgzannen əs Məşşina da wər əmmənkadan, fəl ad əgrəwan əntanay da taqqat ɣur Məşşina.

12 İbrahim imos harwa da abba n aytedan win əmmənkadnen, mišan wərgəɣ əmənəkəd-nasan ɣas a fəl əffəllan, kalar tilalt a əgan tarrayt n əzəgzan ta iga əmaraw-nanaɣ İbrahim harwa da wər immənkad.

13 Məşşina iga arkawal y İbrahim əd hayawan-net as ad əgrəwan əddənet. Arkawal wen wər itawagga y İbrahim fəl ləkkum-net y əşşəriɣa, kalar ig-as-tu Məşşina əs tarrayt ən taqqat tat-t-ikfat əzəgzan-net.

14 As imos as tarrayt ən ləkkum y əşşəriɣa as z'əgrəwan aytedan arkawal wen, wədi əzəgzan wər ila tarna waliyyat, arkawal wen deɣ ad ib'as t-illa.

15 Fəlas əşşəriɣa itaway-du təmazrəyt id wər nəfreg a t-idu-nəsandu, təmazrəyt amaran

tətaway-du alham. Amaran edag wa wər iha əşşərixa, wədi wər tu-za-təggəz təmazrəyt.

¹⁶ Ənta den dağ əddəlil wa fəlas arkawal wen ad itəwəgrəw əs tarrayt n əzəgzan, fəl ad iqqəl təhəkkut təmosat arraxmat. Əmmək en dağ as arkawal wen ittidda y əzzurrəyya n İbrahim ketnet, almaçna wərgəç win əlkamnen y əşşərixa ças, kalar harkid win obaznen tarrayt n əzəgzan ta n İbrahim imosan abba-nana ketnana.

¹⁷ Awen da a ihan Əlkəttaban id ənnan: «*Əgeq-qay əmaraw ən təmattiwen əknânen igət.*» İmos abba-nana ketnana dat Məşşina s ənta as izzəgzan, Məşşina s ənta a ihakkin təməddurt i win aba, ixallak-du awa tu-wər-nəlla.

¹⁸ İbrahim iggaz alxalat a dağ-as tu-wər-illa attama waliyyan, mişan izzəgzan iga attama-net dağ Məşşina. Əmmək en dağ as iqqal *abba ən təmattiwen əknânen igət*, s əmmək was das-itawanna: «*Awen dağ a dər z'agdin hayawan-nak.*»

¹⁹ Wər ides wala əzəgzan n İbrahim kuddeç as issân as taçəssa-net [zun as] təmmût fəlas izay-in temeday n awatay, Sarata deç təwaşşar təggigra.

²⁰ İbrahim wər iga aşşak dağ arkawal ən Məşşina zun awedan wər nəzzəgzan, kalar isassahat-tu əzəgzan-net issəçmar tanaya ən Məşşina.

²¹ Isannahal ikus n aşşak as Məşşina ila tarna n ad assandu arat was iga arkawal-net.

²² Awen dağ a fəl «*das-itawaxsab awen əs tişit n awedan oçâdan.*»

²³ Mišan wərgex əddəlil-net ənta ɣas a fəl itawaktab as: «İtawaxsab-as awen»,

²⁴ kalar nakkanay da itiwaktab fəl əddəlil-nana, amaran Məşşina nakkanay da ad ixsəb taqqat-nana. Nakkanay əzəgzan a sər-əs nəga, ənta a d-issənkaran Əməli-nana Ƴaysa daɣ təmattant

²⁵ s ənta a itawakfan fəl əddəlil ən bakkadan-nana, itawasankar-du fəl ad nəgrəw taqqat dat Məşşina.

5

Agaraw ən taqqat əs tarrayt n əzəgzan d əlyillas

¹ Daɣ adi as nəgraw taqqat dat Məşşina s əzəgzan-nana, wədi nəgrâw alxer gar-enay əd Məşşina əs tarrayt n Əməli-nana Ƴaysa Əlməsix.

² Tarrayt n Əlməsix as nəgraw arraxmat [s əssəbab n əzəgzan-nana]. Arraxmat en ənta fella-nana. Nəddəwat amaran attama wa nəga daɣ tanaya ən Məşşina, ənta a imosan abarag-nana.

³ Dənnəg awen fadda, nəsabarag kudde nəha təssust, fəlas nəssân as təssust ənta a du-təawayat zəmmerat.

⁴ Zəmmerat ten amaran ənta a dana-təhakkıt tişit n aytedan əlânen almaɣna, amaran as nəqqal aytedan əlânen almaɣna wər za nam-mazzay d igi n attama daɣ Məşşina.

⁵ Məşşina amaran wər isərmig i daɣ-as igân attama, id tara-net a tədnayat iwallan-nana əs tarrayt n Infas wa Zəddigan wa danaɣ-itawakfan.

⁶ Fəlas harwa danax-wər-təqqel alfaydat waliyyat ad immut Əlməsix fəl əddəlil n aytedan wər nəzəgzan əs Məşşina dağ alwaq wa iskat Məşşina y awen.

⁷ İzzəwat i z'iqbələn ad t-iba kuddeğ fəl əddəlil n awedan oğadan. Mijas ifrâğ awedan ad iqbəl təmattant fəl awedan olağan.

⁸ Mişan əmmək da was danax-issəkna Məşşina tara ta danax-iga: Harwada nəmos inas-bakkadan ad aba Əlməsix fəl əddəlil-nana.

⁹ Dad zamas əmərədda nəgraw taqqat əs tarrayt n əzni n Əlməsix, manəmmək as danax wər z'assafsu dağ alham ən Məşşina?

¹⁰ Fəlas, dad zamas harwa nəmos izənga ən Məşşina da nəga dər-əs alxer əs tarrayt ən təmattant ən Barar-net, manəmmək as wər za nəgrəw efsan s əssəbab ən təməddurt ən Barar-net əmərədda a dər-əs nəga alxer.

¹¹ Amaran iyyan arat as Məşşina a fəl nəsaftalla əs tarrayt n Əməli-nana Ƴaysa Əlməsix s ənta a danax-igan əmərədda alxer əd Məşşina. Ənta den dağ abarag-nana.

Abakkad n Adəm d arraxmat ən Ƴaysa Əlməsix

¹² Ma təssoka za batu ten? Adi za as tarrayt n awedan iyyanda as d-iggaz abakkad əddənət, abakkad amaran ənta a d-ewayan təmattant. Əmmək en dağ as təmattant təll-ay y aytedan kul fəlas ketnasan əgân ibakkadan.

¹³ Ənta abakkad ill-ay harwa da wər d-izazzabbat Məşşina əşşərixa-net fəl ənnəbi

Musa, amaran abakkad wər ixəssəb, as tu-wər-illa əşşəriya.

¹⁴ Dər iga awen da ya təmattant təll-ay təkâm daɣ əddənet a d-obazan ɣur Adəm har Musa. Təll-ay harkid y aytedan win wər nəga abakkad olân əd wa n Adəm s ənta a ihan əlmital ən wa du-z-asin.

¹⁵ Mişan təmazrəyt n Adəm wər tola əd təhəkkut ta danay-iga Məşşina s arraxmat-net. Tidət as aytedan aggotnen aba-tan fəl əddəlil ən təmazrəyt n awedan iyyanda a t-imosan Adəm. Ma dər ogda igət n arraxmat ən Məşşina, təmosat təhəkkut-net ta du-tosat əs tarrayt n awedan iyyanda a t-imosan Ƴaysa Əlməsix? Arraxmat ten əd təhəkkut ten wər əlenat əddukad, amaran ewâdnat-in aytedan əknânen igət.

¹⁶ Awa du-tətaway təhəkkut ən Məşşina wər ola d awa d-eway abakkad n awedan iyyanda. Dəffər abakkad wa iga Adəm, Məşşina iwwiddab s əşşəriya-net aytedan kul. Təhəkkut amaran ta d-iga Məşşina taqqat as tətaway aytedan, amaran tosâ-du dəffər as əgân aytedan təmazrəyt təgget.

¹⁷ Illikan as təmazrəyt n awedan iyyanda a du-tewayat as təkam təmattant əddənet əs tarrayt n awedan iyyanda wen. Mişan əs tarrayt ən Ƴaysa Əlməsix ɣas-net, əgrâwan aytedan a ogaran awen wəllen. Aytedan win əgrawnen arraxmat wər nəla əddukad əd təhəkkut-net təhəkkut taqqat, win di ad əddəran əxkəman deɣ əs tarrayt n awedan iyyanda a t-imosan Ƴaysa Əlməsix.

¹⁸ Daɣ adi, kud təmazrəyt n awedan iyyanda

teway-du attadib s aytedan kul, wədi aytedan kul ad əgrəwan taqqat təhakkit təməddurt əs tarrayt n əmazal oğadan n awedan iyyanda. Əmazal wen tamattant ən Ƴaysa Əlməsix a t-imosan.

¹⁹ Zund əmmək as təmazrəyt n awedan iyyanda teway-du as əqqalan aytedan aggotnen inasbakkadan, əmmək en dağ as əbərdəg n awedan iyyanda a du-z-awəyan s aytedan aggotnen ad əgrəwan taqqat dat Məşşina.

²⁰ Əşşəriya amaran osâ-du fəl ad təttəy təmazrəyt wəllen. Mişan ibakkadan as əggətan dağ adag a dənnəg-san du-təssəfəl arraxmat ən Məşşina.

²¹ Dağ adi dad zamas abakkad ixkâm fəl əddənət iddew əd təmattant, wədi arraxmat ən Məşşina da ad təxkam tidaw əd taqqat fəl a danay-takfu təməddurt ta təxlalat əs tarrayt n Əməli-nana Ƴaysa Əlməsix.

Tarna n Əlinjil: Awa du-tətaway taqqat ta ihakku əzəgzan

6

Nəddirfa dağ əkkəlu n abakkad

Ab-ana dağ batu ta təqqalat abakkad nəddar əs tərtəyt d Əlməsix

¹ Ma za nannu dağ adi? Awak ad naglu dağ igi ən bakkadan fəl ad təttəy arraxmat ən Məşşina?

² Kala kala! Nakkanay win əganen təmattant ta dana-təzammazzayat əd bakkadan, manəmmək as za naglu dağ igi-nasan?

³ Nakkanay ketnanay əmmək a nəmos as nətawasalmax day aman s esəm ən Ƴaysa Əlməsix, awak tatawt a din-təgam as nərtây dər-əs day təməttant-net?

⁴ Day adi tamattant a nəga, nətawanbal-in, nərtây d Əlməsix s alamax wa nəga day aman s esəm-net. Awen day as zund əmmək as d-inkar Əlməsix day təməttant əs tarrayt ən tanaya n Abba-nana, əmmək en day as nakkanay da ad nagu təməddurt taynayt.

⁵ Dad zamas nərtây dər-əs day təməttant tolat əd ta-net, wədi a dər-əs nərtəy əs tanakra day təməttant tolat əd ta-net.

⁶ Nəssân day adi âs aggadəm was kala a tu-nəmos, wədi itawataytay fəl təgəttawt iddew d Əlməsix. Əmmək en day as təmust-nana ta tərəwat ən tişit ən nasbakkadan təhlak, ab-as tu-təlla, nakkanay dəx nəmməzzay d əkkəlu, a t-imosan tişit ən nasbakkadan.

⁷ Fəlas awedan wa aba, wədi iddirfa day abakkad.

⁸ Nakkanay amaran, dad zamas ab-ana nəddew d Əlməsix wədi nəzzigzan as a dər-əs nidaw day təməddurt da,

⁹ id nəssân as Əlməsix wər tu-z-iba dəffər tanakra ta d-iga day təməttant. Ab-as fall-as təla təməttant tarna waliyyat.

¹⁰ Fəlas aba-tu, amaran əddəlil n abakkad a fəl t-aba day taklat iyyadda. Əmərədda təməddurt ta iga, Məşşina as tat-iga.

¹¹ Day adi kawanay da agiwat i man-nawan iduf n as aba-kawan day batu ta n abakkad, tagim dəx iduf n as təddâram i Məşşina day tassağ d Əlməsix Ƴaysa.

12 Dağ adi ad wər iləs abakkad axakam fəl təxəswen-nawan əmosnen arat itamattin, wala təlkəmam y arak deranan-net.

13 Ad wər tətayyim şisəllad-nawan y abakkad, əqqəlnat zun təzoli as tətawamazal təkma; kalar akfiwat iman-nawan i Məşşina, təqqələm zun aytedan aba a d-ənkarnen dağ təmattant, takfim şisəllad-nawan i Məşşina ad əqqəlnat təzoli tətamazalat awa oğadan.

14 Fəlas ab-as təhəm təla n abakkad id ab-as təhəm taymar ta n əşşərixa wa n İttawret, kalar təggazam taymar ta n arraxmat ən Məşşina.

Nəddirfa dağ bakkadan fəl ad nəybəd Məşşina

15 Ma za nagu za? Awak ad nagu ibakkadan fəlas nokay-du azzaman win əşşərixa nəggaz win arraxmat? Kala kala!

16 Awak wər təssenax əs as təgey iman-nak akli n awedan təbbərdagax-as, wədi kay təqqalax akli n awedan wen? Dağ adi wa yas təqqalax akli n abakkad itawayan əs təmattant, wa təqqalax akli ən tarrayt ta n əbərdəg i Məşşina tətawayat əs taqqat?

17 Mişan təmmalen i Məşşina! Dəffər as kala təmosam eklan n abakkad, əməərədda təbbərdagam dağ wallan-nawan y əşşərədan n əsəssəyri wa tətawaggam.

18 Təddərfam dağ bakkadan, təqqalam əməərədda eklan n awa oğadan.

19 Əlmital wa taggaq-qu s anamod wa n aggadəm fəl əddəlil ən rəkkəm-nawan a dər du-təxlâkam. Zund əmmək as kala ad təsammalkawam şisəllad-nawan təmosam eklan n awa immədasan d awa xaraman fəl

ad tawədam taxxaramt ketnet, əmmək di dağ as əməyəddə akfiwat şisəllad-nawan y ad təqqəlam eklan n awa oğadan fəl ad tawədam tazdak.

²⁰ Fəlas assağa wad təmosam eklan n abakkad, əddi təddirfam dağ anamod wa n taqqat.

²¹ Ma dər ola awa du-təsaxsalam dağ azzaman win di? İngəm aratan as əməyəddə sikarakadan-kawan, fəlas təsəlkamt-nasan təməttant?

²² Mişan əməyəddə dad zamas təddərfam dağ bakkadan təqqalam eklan ən Məşşina wədi tazdak a du-za-təssəxsəlam, amaran təsəlkamt-nawan təməddurt ta təxlalat.

²³ Fəlas ərruzmatan n abakkad təməttant, mişan təhəkkut ta danax-issənsə Məşşina təmos arraxmat-net, təməddurt a tat-imosan ta təxlalat dağ tassağ d Əməli-nana Əlməsix Ƴaysa.

7

Nəddirfa dağ əşşərixa wa danax-obazan

Nəddirfa dağ awa danax-issəwar əşşərixa

¹ Awak masnat a wər təgəm ya imədrayan-in as əşşərixa wər ilzem ar aytədan win əddarnen? Əssānax as əhân-kawan salan n əşşərixa.

² Əmmək en dağ as tantut təzləfat iket iddar aləs-net osağ-qat dər-əs əşşərixa. Mişan as aba aləs-net ad taddafart dağ əşşərixa was kala a tan-osağ.

³ Dağ adi as imos as harwa ad iddar aləs-net a tat-izlaf aləs iyyan, wədi əzzəna a təga, mişan as aba aləs-net wədi təddərfa dağ əşşərixa. Əddi kud tat-izlaf aləs iyyan da wər z'itəwənnu təga əzzəna.

⁴ Emmək en da a təmosam kawanay da ya imədrayan-in: kawanay da aba-kawan daɣ batu ta n əşşəriya wa n Ettawret əs tarrayt ta n taɣəssa n Elməsix. Emmərədda təhâm təla iyyat taynayət a tat-imosan ta n Wa d-inkaran daɣ nəmməttan fəl a du-nəsaxsal tənfa daɣ tarrayt ta n Məşşina.

⁵ Harwa ad nəlkâm i deranan ən wallan-nana, əhân-anax arak deranan win d-itaway əşşəriya, əttâfan tənət ən təsəllad-nana fəl a du-nəsaxsal aratan win tawaynen əs təməttant.

⁶ Mişan əməərədda, nəddirfa daɣ əlxəkum wa n Əşşəriya, ab-ana daɣ batu n aratan win danaɣ-əganen daɣ təla. Daɣ adi nəfrâg ad nəxbəd Məşşina əs təməddurt taynayət əs tarrayt n Infaş wa Zəddigan, wərgəx s anamod wa irəwan n əşşəriya wa n Ettawret imosan arət igmâdan.

Assa n əşşəriya d ənəfilal n abakkad

⁷ Ma za nannu daɣ adi? Awak əşşəriya imitalla d abakkad? Kala kala! Mişan ya əşşəriya ənta a di-izzəzdayan abakkad, id ənnar wər inna əşşəriya: «*Ad wər tagax attama-nak daɣ ares n awedan.*» Wər z'əssənax awa imos almaɣna n igi n attama daɣ ares n awedan.

⁸ Emmək en daɣ as issolam abakkad daw alwajiban, təzzar iga-du daɣ əwəl-in arak deranan as tu-wər-illa a daɣ wər əgen. Fəlas as tu-wər-illa əşşəriya, wədi abakkad da zun as immut.

⁹ Dat awa harwa a tu-wər-illa əşşəriya nak əddâra. Mişan assaxa wa d-osan alwajiban ənta ad iqqal abakkad arət iddâran,

¹⁰ nak amaran ab-i. Alwajiban win as a ihoran âs tәмәddurt as ətawayan, nak tәмattant as di-ewayan

¹¹ fəlas abakkad a issolaman daw alwajib n əşşəriya, issəxrak-i inç-i sər-əs.

¹² Daç adi əşşəriya i zəddigan, alwajib deç zəddiç oçâd olâç.

Tәмәddurt ta n ləkkum y əşşəriya

¹³ Awak nak arat olaçan a di-iqqalan tәмattant? Kala kala! Abakkad a imosan əssəbab n awen kul. Daç adi abakkad isannafalal-du awa imos əs tidət. İşşəçal awa olaçan fəl a sər-i d-awəy tәмattant. Əmmək en daç âs tarrayt n alwajib as tənafalal tallabəst wər nəla əddukad ta təhat abakkad.

¹⁴ Nəssân as əşşəriya Infas ən Məşşina a d-ifal. Mişan nak awedan a əmosa wər nəlkem ar i deranan-net. Ənzex-in əmosa zun akli n abakkad.

¹⁵ Fəlas awa tagga wər t-əgre. Arat wa areç wər tu-təgga, amaran arat wa əkyada ənta a tagga.

¹⁶ Amaran as imos as taggaç awa wər əre, wədi əqbâlâç as əşşəriya olâç.

¹⁷ Əmərədda wərgex nak a itaggin awen, kalar abakkad wa daç-i içsaran a t-itaggin.

¹⁸ Fəlas əssânâç as arat wa olaçan wər daç-i içser, almaçna wər iha taçəssa-nin. Əfrâga tara n awa olaçan, mişan wər əfregaç əmazal-net.

¹⁹ Wər təmizilaç awa olaçan s ənta a areç, kalar awa wər noleç a tamazala s ənta a wər areç.

²⁰ As imos as tamazalaḡ awa wər areḡ, wədi wərgex nak a t-itamazalan, kalar abakkad wa di-izdaḡan.

²¹ Emmək en daḡ as d-əgreḡ as: Id areḡ igi n awa olaḡan, a dat-i d-iməl awa wər noleḡ.

²² Əfrâya daḡ əwəl-in y as areḡ əşşəriḡa ən Məşşina,

²³ mišan əfrâya daḡ təsəllad-in y əşşəriḡa iyyan ibbillanan d əşşəriḡa wa əqbalan man-in. Emmək en daḡ as əqqalaḡ akli n əşşəriḡa wa n abakkad ihân şisəllad-in.

²⁴ İket aḡşud ən man igraw-i! Ma di-za-assafsin daḡ təḡəssa tas təsəlkamt-net təmattant?

²⁵ Təmmalen i Məşşina əs tarrayt n Əməlinana Ḡaysa Əlməsix! Daḡ adi əs tayttay-nin za əmosaḡ akli n əşşəriḡa ən Məşşina, əs təḡəssa-nin amaran əmosaḡ akli n əşşəriḡa wa n abakkad.

8

İnfəs ən Məşşina ihakk-ana təməddurt tay-nayat

Təməddurt ta danaḡ-ihakku İnfəs ən Məşşina

¹ Adi a fəlas əmərədda ab'as t-illa attadib i win ərtaynen d Əlməsix Ḡaysa.

² Fəlas tarna ta n İnfəs wa ihakkin təməddurt ihân Ḡaysa Əlməsix təsiddarfət-kay daḡ tarna ta n abakkad əd təmattant.

³ Əşşəriḡa wa n Əttawret wər ifreg igi n awen, fəlas igdal-as-tu rəkkəm ən təḡəssa n aggadəm. Adi a fəl d-issəgla Məşşina Barar-net iman-net iha təḡəssa zun ta n nasbakkadan a nəmos, iqqal

takutay ta təmmasat ibakkadan id Məşşina a t-itəwwəddaban dağ adag-nana. Emmək en dağ as z'izzərəz tarna ta fall-anax ila abakkad.

⁴ Arat wen ig-ay fəl ad nəfrəg əmazal n Əşşərixa wa n Ettawret əs təməwit toxadat nakkanay win əlkamnen i tara ta n Infas wa Zəddigan, wərgex ta n aggadəm.

⁵ Aytedan win əlkamnen i tara ta n aggadəm, win di imedranan əd deranan win aggadəm a taggin, amaran win əlkamnen i tara ta n Infas wa Zəddigan, win di imedranan əd deranan win Infas wa Zəddigan a taggin.

⁶ Ləkkum i medranan əd deranan win aggadəm təmattant as itaway, amaran ləkkum i medranan əd deranan win Infas wa Zəddigan, təməddurt taynayət as itaway d agaraw n alxer xur Məşşina.

⁷ Fəlas imedranan əd deranan win aggadəm əzzingen Məşşina id aggadəm wər ibbərdag y əşşərixa wa n Məşşina, amaran wər t-ifreg.

⁸ Aytedan win əlkamnen i deranan ən təxəssanəsan wər əfregan gərrezat i Məşşina.

⁹ Kawanay, as imos as izdâx-kawan Infas ən Məşşina wədi ab-as təlkamam i medranan əd deranan n aggadəm, kalar win Infas wa Zəddigan as təlkamam. Awedan wa wər iha Infas wa n Əlməsix, wədi wərgex i n Əlməsix.

¹⁰ Mişan as imos as tərtâyam d Əlməsix, wədi kud imos as təxəssanəwan təsəlkamt-net təmattant fəl əddəlil n abakkad, da Infas wa Zəddigan ikf-iwan təməddurt taynayət fəlas aytedan oxadnen a təmosam dat Məşşina.

¹¹ Şixəswen-nawan təsəlkamt-nasnat

təmattant; dər iga awen da ya as imos as ih-iwan Infas ən Wa d-issənkarən Ƴaysa Əlməsix daƷ təməttant, wədi Wa d-issənkarən Ƴaysa Əlməsix daƷ təməttant ad agu təməddurt taynayət daƷ təƷəswen-nawan s Infas-net Zəddigan a kawan-ihân.

¹² DaƷ adi, imədrayan-in, əllan-tu aratan a danax-əhhişşalnen, mişan wərgəƷ daƷ anamod wa n deranan n aggadəm əranen ad nəlkəm y awa əran man-nana.

¹³ Fəlas as təgam təməddurt təlkâmam y awa əran man-nawan, wədi a kawan-iba təggəzəm Jahannama. Mişan as toyyam imazalan win əran man n aggadəm, təlkamam i win ira Infas wa Zəddigan a kawan-ihân, wədi ad təddəram har faw.

Məşşina ig-anax bararan-net əs tahakkay ta danax-iga Infas-net di Zəddigan

¹⁴ Fəlas aytedan kul win daƷ innoda Infas ən Məşşina, win di bararan ən Məşşina a mosan.

¹⁵ Infas wa təgrawam əddi, wər kawan-iga eklan, wər tu-təgrəwam fəl a taglim tah-iwan tasa, kalar təgrâwam-tu fəl a təqqələm bararan ən Məşşina. Infas en daƷ a sər-na d-əwayan as nədkâl imaslan-nana nəgannu i Məşşina: «Abba! Abba!»

¹⁶ Infas wa Zəddigan əd nakkanay iman-nana a tagayyatnen as nəmos bararan ən Məşşina.

¹⁷ Amaran, dad zamas bararan ən Məşşina a nəmos, wədi iməkkusa n arraxmaten-net a nəmos, amaran nədrâw təkəsīt ten d Əlməsix dad zamas nəddew dər-əs daƷ aƷazab fəl ad nəgrəw tədəgart-nana daƷ tanaya-net.

Infas əd tanaya win d-əzaynen

¹⁸ Iga xur-i âs alɣazab wa nətəggu əmərədda wər ewed wala daɣ tanaya ta dana-du-z-isənnəfiləl Məššina.

¹⁹ Awa d-ixlakan kul ikna əddəguz daɣ anay n alwaq wad z'isənnəfiləl Məššina bararan-net.

²⁰ Fəlas awa d-ixlakan kul iggâz təla ən taɣmar ta n təbənnan. Wərgəx əntanay a əranen awen, kalar Məššina a tan-igan daɣ fassan ən taɣmar ten. Ill-ay attama n

²¹ as taxlək ten ənta iman-net da ketnet ad taddarfət daɣ əhluk wa təga imosan əkkəlu, fəl ad əgrəwan əntanay da əlləllu igân daɣ tanaya ta z'əgrəwan bararan ən Məššina.

²² Amaran nəssân wəllən as har harwa da taxlək ketnet təddew daɣ təhənəffa əd təlawayt zun təntut tətəgəzət amzur.

²³ Mišan wərgəx əntanay ɣas a tihənəffitnen, nakkanay a əgrawnen Infas wa Zəddigan imosan tədəgart ta tazzarat daɣ təhək ən Məššina, da nətihənəffit daɣ man-nana nəkna əddəguz daɣ a danax-əgu Məššina bararan-net akf-anax tədərfit təkmâlat.

²⁴ Fəlas nəgrâw efsan, s attama wa nəga. As nəhannay awas nəga attama-net, wədi ab'as imos attama. Ma imos wa z'əgin attama n arət ihannay?

²⁵ Mišan as nəga attama-nana daɣ awa wər nəhənnəy, wədi a das-nəqqəl əs zəmmerat.

²⁶ As nəga awen a d-asu Infas wa Zəddigan idhəl-ana daɣ rəkkəm-nana fəlas nakkanay wər nəssen arət was ihor a tu-nansəy daɣ təwatriwen-nana. Mišan Infas wa Zəddigan

iman-net itaggu šihənəffa as wər ifreg awedan emel-nasnat.

²⁷ Amaran wa itamayyan iwəllan, issân awa təmos ənnəyat n Infas wa Zəddigan id ənta agna wa n Məşşina as itattar s esəm ən məzzəgzan.

²⁸ Amaran nəssân âs arətan kul əmosan tənfa n aytedan win əranen Məşşina tiwaxran-du deş əs farrayt-net.

²⁹ Fəlas win isannafran harwa daş tizarat win di otâs-asan ad əqqəlan əlmital ən Barar-net, fəl ad iqqəl Barar-net en aḡafadday daş bararan aggotneñ.

³⁰ Amaran win as otas Məşşina teḡaray-nasan kala da, win di iḡr-ên, amaran ig-en aytedan oḡâdnen, ikf-en deş tanaya.

Ikus n aššak daş tara ta danax-iga Məşşina

³¹ Daş adi ma za nannu daş batu ta? As imos as Məşşina iwâr aganna-nana, ma ifragan ad iqqəl əllid-nana?

³² Məşşina as Barar-net an iyyanda da wər t-oyya, kalar ikf-ay fəl əddəlil-nana ketnana, manəmmək as dana-wər-z-akfu arat kul s arraxmat-net, nədrâw awen əd Barar-net?

³³ Ma z'abəzan s əšşəriḡa aytedan win isannafran Məşşina? Awak aytedan win, wərgəḡ Məşşina a tan-ikfan taqqat.

³⁴ Ma imos za wa tan-z-abəzan s əšşəriḡa? Əlməsix [Yaysa] iman-net as t-aba, amaran wərgəḡ awen ḡas, kalar itawasankar-du daş təməttant. Iha əmərədda aḡil ən Məşşina imos almawakkil-nanaḡ a danax-itaggin šiwatriwen.

³⁵ Ma ifragan a danax-izəmməzzəy əd tara n Əlməsix? Awak təssust? Məḡ təməḡatirt, məḡ

ətəwədgaz, meḡ gələk, meḡ zəlləm, meḡ igguz n alḡarar ən tamattant, meḡ takoba?

³⁶ Ənnan Əlkəttaban: «*Tâwakkasan day-na man əzəl kul fəl əddəlil-nak. Nətiwaxsab zun ayfəd tawagzamnen.*»

³⁷ Mišan day awen ketnet nəgarrow tarna ta togarat əs tarrayt ən wa danax-iran.

³⁸ Fəlas əkkasax aššak as gər za təmattant, wala təməddurt, wala angalosan win əmməzraynen Məššina, wala taymaren n əššur šin əhanen ətənkul, wala azzaman win nəha əməərədda, wala azzaman win d-əzaynen, wala šiḡurad,

³⁹ wala awa ihan afalla, wala wa ihan eres, wala arat waliyyan a d-ixlâkan, xasil wər t-illa a ifragan a danax-izəmməzzəy əd tara ta danax-isannafalal Məššina əs tarrayt n Əməlinana Əlməsix Ƴaysa.

Əlinjil d İsrayil: Edag wa ittaf İsrayil day attarix n əlḡillas

9

Tarna ən Məššina tosâ-du əs tarrayt n İsrayil

İduf wa iga Buləs i Kəl-İsrayil day əwəl-net

¹ Tidət a əmmala s esəm n Əlməsix, wər tægga bahu, iman-in əggəyyen-i fəl awen əs tarrayt n İnfəs wa Zəddigan.

² Əḡşâdan man-in wəllen, əššiwaša deḡ wəllen.

³ Awalla wər di-ikma ilḡan-i Məššina ammaz-zaya d Əlməsix fəl əlḡillas ən kəl tamet-in d aytedan win di-erawnen,

⁴ a tan-imosan Kəl-Israyil. Ēntanay a əlanen almaqam ən tišit ən bararan ən Məššina win d-iskāt i man-net. Ēntanay deḡ a mosnen aytedan win daḡ du-tənafalal təmust ən Məššina əs tanaya, nafalalan-du deḡ daḡ-san arkawalan ən tassaḡ, əd təhəkkut ta n Ēššəriḡa, d əlḡibada, d arkawalan.

⁵ Ēntanay deḡ a mosnen əzzurrəyya ən marawan-nana win ərəwnen, Ēlməsix deḡ imos iyyan daḡ-san əs tišit-net aggadəm. Ēlməsix s ənta a illan dənnəḡ əkkulluk n arāt, imos Məššina. Attamalet esəm-net har faw! Amin!

Awa imos akal wa n Israyil

⁶ Arāt wen wər imos almaḡna-net as awal ən Məššina ab-as ila almaqam. Kala kala! Ēnta ya wərgəḡ aytedan kul win d-əḡmadnen Israyil a mosnen Israyil.

⁷ Win d-əḡmadnen Ibrahim deḡ wərgəḡ kul əmosan bararan-net, kalar a inna Məššina y Ibrahim daḡ Ēlkəttaban: «Aytedan win d-əḡmadnen Isəhaq a z'iqqələn əzzurrəyya-nak.»

⁸ Almaḡna n awen as wərgəḡ bararan win əhəwnen əs təməwit ta n aggadəm a mosnen bararan ən Məššina. Kalar bararan win əhəwnen əš təməwit ta tənammannaḡat d arkawal ən Məššina, əntanay a ixsab Məššina daḡ əzzurrəyya n Ibrahim.

⁹ Ēnta da awa inna arkawal: «A kay-d-əqqəla adan a da əznin, əddi da tamahharak-nak Sarata təla barar.»

¹⁰ Amaran wərgəḡ awen ḡas. Awen daḡ a təḡa Raqqiyetu, ənta da əššin bararan ən yayyan n

eknewan a təla, amaran ketnasan aljad-nanax Isəhaq a dər tan-təla.

¹¹⁻¹² Məşşina ila tarrayt-net tas isanafran aytedan. Əsənnəfrən-net aytedan ilkâm i tayaray ta tan-iga əs tarrayt-net, wərgəx imazalan-nasan. Fəl ad isattaddu tarrayt ta d-iga den, təmosat arat isinafran, inna i Raqqiyetu harwa da wər əhəwan bararan-net, wər əknen wala za wər t-əxşedan: «*Wa waşşaran ad iqqəl akli ən wa əndarran.*»

¹³ Inimannak awen d awa ihan Əlkəttaban as ənnan: «*Arex Yaqub, əkyâdağ Esaw.*»

Məşşina ənta məşşis ən tarna oğâdan

¹⁴ Dağ adi ma za nannu y awen? Awak Məşşina wər oğed? Kala kala!

¹⁵ Fəlas a inna i Musa: «*Ad hənəttey i was arey a das-hanattəy, ilalay i was arey a das-ilala.*»

¹⁶ Emmək en dağ as arat wen wərmad iqqân dağ wa ira awedan, wala aratan win as ozal dağ agamay-nasan. Kalar wər iqqen ar dağ Məşşina di n əməhhenən,

¹⁷ s ənta a innan i Firxawna dağ Əlkəttaban: «*Ənəy! Əkfeq-qay almaqam fəl ad assakna tarna-nin əs tarrayt-nak, tagu masnat fəl esəm-in dağ əddənet ketnet.*»

¹⁸ Dağ adi Məşşina itihənəttit i was ira, isagarmam əwəl ən was ira.

¹⁹ Amaran əssânağ as a di-tanna: «*Mafel [dağ adi] Məşşina harwada itabaz aytedan əs mazalan-nasan, dad zamas wər t-illa i ifrâgan əməzrəy ən tara-net?*»

²⁰ Fadda, kay aggadəm, ma təmosağ as təşarrağa əd Məşşina? Awak talaq təfrâg ad

tannu i wa sər-əs išaqqalan: «Mafel tətəggaḡ-i əmmək wa?»

²¹ Awak akanaw wərgeḡ ənta a ilān talaq itaggu sər-əs ikassan âs wiyyad za tiwasansan y əzəl a sər-san iskâtan, win hadatnen amaran tiwasataymalan əzəl kul?

²²⁻²³ Emmək en daḡ a əgan aratan win isammatag Məššina. Iga dər-na təzaydart tagget nakkanay a əhornen d əhluk fəlas ira ad isənnəfiləl alham-net əd tarna-net. Ira deḡ ad isənnəfiləl y aytedan wiyyad tanaya-net wər nəla əddukad. Aytedan win den əntanay as ihanattat, əntanay deḡ a isammatag kala da, y a dər-əs ərtəyan daḡ tanaya-net.

Məššina iḡra Kəl-Īlyəhud d aytedan win tan-wər-nəmos

²⁴ Aytedan win den nakkanay a tan-imosan. Iḡr-ana-du Məššina daḡ Kəl-Īlyəhud, iḡr-ana-du deḡ daḡ win wər nəmos Kəl-Īlyəhud.

²⁵ Awen daḡ a ihan əlkəttab wa n ənnəbi Osay as inna: «*Win wər nəmos tamattay-nin, a tan-d-aḡraḡ agaḡ-qan "tamattay-nin". Win wər nəmos win əkneḡ tara, a tan-aga "win əkneḡ tara".*

²⁶ Amaran idaggan win daḡ dasan-itawannu: "*Wər təmosam tamattay ən Məššina!*" Idaggan win di da a daḡ dasan-z-itawannu "*bararan ən Məššina di iddaran.*"»

²⁷ Ənnəbi Isayas deḡ iktâb daḡ batu n Israyil as: «*As əgan maddanəs n Israyil iḡət wa n təblalen n amaḡal, arat daḡ-san ḡas a z'afsin.*

²⁸ *Fəlas Amaylol ad assandu awal-net fəl əddənet əs təməwit təkmâlat tətərabat.*»

²⁹ Zun batu ta iga ənnəbi Isayas dat awen as inna: «*Kundaba as Əməli di ilan tarna a daɣ-na d-iglazan amasa, wədi ad nəqqəl zun Sədom, nalu əd Gamora.*»

Awa iwaran aggadəm d awa iqqalan Israyil daɣ azzaman win əmərədda

Agaraw ən taqqat s əzəgzan wərgex əs maza-lan

³⁰ Ma za nannu daɣ adi? Aytedan win wər nəmos Kəl-Əlyəhud wər əglayan daɣ agamay ən taqqat mişan əgrawan-tat əs tarrayt n əzəgzan-nasan.

³¹ Kəl-Israyil amaran a gammaynen a d-əssəkməlan ləkkum y əşşərixa fəl ad əgrəwan taqqat, indar-asan.

³² Ma d-ewayan za awen? Adi za iba n agamay-nasan taqqat ten əs tarrayt ta n əzəgzan, əgmayan-tat əs mazalan-nasan. Tənkaf-asan təhunt ta təsəgadlit.

³³ Təhunt ten təmmittal Əlməsix, amaran ənnan Əlkəttaban daɣ batu-net: «*Ənəyat, əssinsa daɣ Səyon təhunt təmosat təsənkəft, təmos dey təsəlit tətagadlit aytedan. Mişan awedan wa sər-əs izzəgzanan wər z'ikərukəd.*»

10

¹ Imədrayan-in, əknex deran n ad əgrəwan Kəl-Israyil efsan, amaran awen daɣ a tansaya Məşşina faw daɣ təwatriwen-in.

² Fəlas əggəyyex as əglâyan daɣ batu ta n Məşşina mişan wər əssərtayan awen əd masnat.

³ Wər əgren tēməwit tas ihakku Məşşina aytedan taqqat, a tat-gammayan əs mazalan-nasan. Emmək di dağ âs wər əbbərdagan i Məşşina, uqayan əs ləkkum i tarrayt tas ihakku Məşşina taqqat.

⁴ Elməsix ənta a imosan təsəxtəmt n əşşəriya y ad iqqəl as aytedan kul wiñ sər-əs əzzəgzannen ad əgrəwan taqqat dat Məşşina.

Efsan s əzəgzan, wərgex əs ləkkum y əşşəriya

⁵ Arat da wa iktab ənnəbi Musa dağ batu ən taqqat ta tətawagrawat əs ləkkum y Əşşəriya wa n Ettawret: «Awedan kul wa d-issəndan əşşəriya, wədi ad igrəw təməddurt s əssəbab n əşşəriya.»

⁶ Mişan ənta da əmmək was tətawagraw taqqat əs tarrayt ta n əzəgzan: «Ad wər təganna dağ man-nak: "Ma z'aggazzayan əs jənnawan?"» Awak Elməsix wərgex izzibbat-du?

⁷ Madex tanna: «Ma z'azzabben iggəz imawetan n amadal?» Awak Elməsix wərgex inkar-du dağ təmattant?

⁸ Awak ma inna Awal ən Məşşina dağ batu ta? A inna: «Awal ihoz-kay, iha imi-nak, iha əwəl-nak,» amaran awal wa batu n əzəgzan a dağ işşewal, ənta dex as nətəggu təlxtubat.

⁹ As təşşewala təqbalax as Ƴaysa imos Əməli, təzzəgzana dağ əwəl-nak as issinkar-tidu Məşşina dağ təmattant, wədi kay təgrāway efsan.

¹⁰ Fəlas awedan wa izzəgzanan dağ əwəl-net, wədi ad t-akfu Məşşina taqqat. Amaran

wa iššewalan imal əzəgzan-net, wədi ad t-akfu Məššina efsan.

¹¹ Ənnan Əlkəttaban: Awedan kul wa «*fall-as iffəllan iga daχ-as attama-net, wər ilkem ad ikirakad.*»

¹² Wər izlay wa imosan Ag Əlyəhud wala wa tu-wər-nəmos. Ketnasan Əməli-nasan iyyanda, ihakkin s əlləllu-net taggast y aytedan kul win daχ-as tat-əgmaynen.

¹³ «*Fəlas awedan kul wa igmayan taggast daχ Əməli, wədi ad igrəw efsan.*»

Kəl-İsrayil wər əzzəgzanan s Əlinjil

¹⁴ Məni za əmmək was z'əgməyan taggast daχ was wər əzzəgzanan? Məni əmmək was sər-əs z'əzzəgzanan wər əslen y awal-net? Məni əmmək was das-z-aslin da wər t-illa i dasan-t-imalan?

¹⁵ Məni əmmək was tu-z-əməlan aytedan a dasan-t-əmələn as imos as wər t-illa i tan-issiglan? Ənnan Əlkəttaban: «*Iket šihussay əganat-tanat takkolen n aytedan win əmmələn isalan n alxer a imos Əlinjil!*»

¹⁶ Mišan wərgəχ Kəl-Əlyəhud kul əbbirdagan y Əlinjil. Inna Ənnəbi İsayas: «*Əməli, məni wa izzəgzanan s awa nənna?*»

¹⁷ Daχ adi, isalan win as nəsla, əntanay a dutawaynen əzəgzan, amaran awal n Əlməsix a əmosan.

¹⁸ Mišan əsəstan da wa tagga: Awak Kəl-Əlyəhud wər əslen y awal wen? Wəllən za as əslân-as. Ənnan Əlkəttaban: «*Əməli-nasan təsl-as əddənət ketnet, awal-nasan əruru n amađal ketnet ewād-tu.*»

19 Əlasax əsəstan harwa da ənne: Awak tamattay n İsrayil masnat a wər təga daɣ awen? Ənnəbi Musa a daşan-t-imalan əs tizarat. Inn-asan: «*Inna Məşşina, a kawan-agax inəmmənzax ən win âs tamattay da wər tatəmosan, aknaɣ daɣ-wan igi n alham ən tamattay wər nəla tayttay.*»

20 Ənnəbi İsayas fadda a dasan-innan əs təholat: «*Əgrawan-i win di-wər-nəgəmməy, san-nafalalax iman-in i win di-wər-nonsay wala.*»

21 Mişan daɣ batu ta n Kəl-İsrayil inna: «*Əzəl kul əzzâlaɣ əfus-in ɣarra tamattay təmosat inəmməzray ən nəffəllag.*»

11

Tarrayt ta d-iga Məşşina d awa d-izayan İsrayil

Məşşina isinafran i man-net aytedan win d-əggolaznen

1 Ənne daɣ adi: Awak Məşşina agamad a iga batu ən tamattay-net? Kala kala! Fəlas nak iman-in iyyan daɣ Kəl-İsrayil a mosa, əmosax ahaya n İbrahim, əgmâda-du tawşet ta n Benyamin.

2 Məşşina wər igmed batu ən tamattay-net as irəw as tat-isannafran. Əngəm təkittəwam awa ənnan Əlkəttaban daɣ batu n ənnəbi İlyas assaxa wad eway tala-net əs Məşşina daɣ batu ən Kəl-İsrayil?

3 Inna i Məşşina: «*Əməli, ənɣan ənnəbitan-nak, jabbarajjen idaggan-nak win təkutawen,*

wər d-iqqim ar nak, amaran gammayan d a day-i əkkəsan iman.»

⁴ Təssânam za awa das-ijjəwwab Məşşina? Inn-as: «*Əsinafranay i man-in əssa gim n aləs wər nəssəjad dat əssənəm wa igan Baxal.*»

⁵ Zund əmmək en day as day azzaman win nəha əmərədda əggolazan-du aytedan isinafran Məşşina s arraxmat-net.

⁶ Day adi, dad zamas arraxmat-net as tan-isannafran, wədi wərgex fəl əddəlil ən mazalan-nasan, madex amaran iqqəl as arraxmat ab-as təmos arraxmat.

⁷ Ma igan day adi? Kəl-İsrayil wər əgrewan awa gammayan. Wər day-san t-igrew ar win isannafran Məşşina. Win hadatnen amaran tawaggan aytedan as garmoman wallan-nasan,

⁸ inimannak awen d awa ənnan Əlkəttaban as ənnan: «*Ikkas-tan Məşşina day əlxəyyar ən man-nasan, ikf-en şittawen wər nəhənnəy wala, əd təməzzugen wər nəşəllu har azalada.*»

⁹ Ənnəbi Dawəd dex inna: «*Əqqəlānet-asan mensewan-nasan taftaw, əqqəlān sangay a tan-z-ibəzan. Əqqəlānet-asan aqadal, əgrəwanet attadib wa dər əhoran.*

¹⁰ *Alsinet şiyyay şittawen-nasan, igmədet-tan asawad-nasan. Kərənbəwanet roran-nasan har faw!*»

Edag wa əhan Kəl-Əlyəhud d aytedan win tan-wər-nəmos day tarrayt ta d-iga Məşşina

¹¹ Ənne day adi: Awak Kəl-İsrayil nigar-tattafan y ad uden har faw? Igmâd aşşak as wərgex awen. Mişan təmazrəyt-nasan a du-tewayat as əgrawan aytedan win wər nəmos

Kəl-Əlyəhud efsan fəl ad əggəznat təsmiten Kəl-İsrayil.

¹² Wala təmazrəyt-nasan təqqal tənəfləyt y əddənət, ətəwərna-nasan dəx iqqal tənəfləyt i win wər nəmos Kəl-Əlyəhud, əngəm in za as d-əğradan əsənəd əbdadan-du?

¹³ Əmərədda kawanay win wər nəmos Kəl-Əlyəhud as əşşewala: Nak anammazul a mosa s aytedan win wər nəmos Kəl-Əlyəhud amaran əssiğmarax əşşəxəl wen,

¹⁴ har əs as imməkkan awen a d-awəya şismiten s aytedan win tawşet-in afsin dağ-san wiyyad.

¹⁵ Fəlas as iqqal as ətəwəkkas-nasan əs tama eway-du amaknaw dağ əddənət, əngəm in za ətəwəsuxal-nasan? Wər t-illa a dər z'alu ar tanakra dağ təmattant.

¹⁶ Amaran as imos as tadagart ta tazzarat dağ təgəlla təkāt i Məşşina, wədi awa dağ-as in-iqqiman ketnet da in Məşşina. As imos as dəx ikewan tiwaskatan i Məşşina, wədi ilədlad da tiwaskatan-as.

¹⁷ Əlmital en dağ a əhan Kəl-İsrayil: İlədlad wiyyad a din-tawakarammatnen dağ aşək. Kay amaran wa wər nəmos iyyan dağ Kəl-İsrayil, təmosa zun ələdlid ən zaytun n əsuf, təzzar tətawagga dağ adag-nasan. Dağ adi kay da tədrāwa dər-san isudar olâğnen win du-nakkasan kewan n azzaytun wa itawanbalan den.

¹⁸ Dər iga awen da ya, ad wər talkax ilədlad win din-tawakarammatnen. Amaran as kay du-təggaz ənnəyat ən zazwar ən man-nak, takta-du

as wərgex kay a ilan ikewan, kalar ikewan a kay-ewaynen əkbâlan-kay.

¹⁹ Ad tanna day adi: İlədlad tawakarammen-in fəl ad əggəzay edag-nasan.

²⁰ Tidət as ətəwəkərəmme a din-əgan lədlad win den fəl iba n əzəgzan. Kay amaran təddara s əzəgzan-nak. Ad wər tagay ime-dranan əmosnen zazwar ən man, kalar əqqəl əmiksad ən Məşşina.

²¹ Fəlas dad zamas Məşşina wər oyya ilədlad win dər d-ixlak ašək, wədi kay da wər kay-z-ayyu.

²² Day adi əssən fəl əlluğ ən Məşşina, əd tallabast n alham-net. Tallabast n alham-net isakn-et i win nəmməzray, əlluğ-net amaran isakn-ak-ku, iket təzizawe day tarrayt n əlluğ wen. As wər təgex adi, wədi kay da a din-tətəwəkərəmme.

²³ Kəl-İlyəhud da as oyyan tarrayt ta n iba n əzəgzan a du-təwəsuxəlan ašək, fəlas Məşşina ila tarna n a tan-d-iləs əsuxəl n ašək wen.

²⁴ Dad zamas kay tətawakaramme-du day ašək ən zaytun n əsuf, tətawaggay ələdlid ən zaytun wa n ənebəl olâğan, manəmmək as du-wər-za-təwəsuxəlan əntanay da təwəggin day azzaytun wa day d-əxlakan?

Elyillas wa d-izayan Kəl-İsrayil

²⁵ Imədrayan-in, wər areğ a dawan-ijhâl əssir wa, fəl ad wər təxilam təlâm masnat iyyat zəwwərat. Edes ən Kəl-İsrayil wər z'ammazzayan ad əffillagan iket wər d-əxsəlan aytedan kul win wər nəmos Kəl-İlyəhud əs Tağmar ən Məşşina.

²⁶ Ēmmək en daɣ as z'igrəw Israyil ketnet efsan id ənnan Ēlkəttaban: «*Wa iɣallasan a d-igməd Səyon, ikkəs inəmməzray daɣ əzzurrəyya ən Yaqub.*

²⁷ *Ēnta da da arkawal wa dər-san z'aga, assaya wa fall-asan z'əkkəsəɣ ibakkadan-nasan.»*

²⁸ Daɣ batu ta təqqalat tugəyt-nasan s Ēlinjil, wədi Kəl-Ēlyəhud əntanay a mosnen izənga ən Məššina fəl ad təgrəwam tənfa n awen. Mišan daɣ batu ta təqqalat anafran wa n Məššina, wədi əntanay a mosnen aytedan win ikna Məššina tara fəl əddəlil ən marawan-nasan.

²⁹ Fəlas Məššina wər d-itəqqəl daɣ təhəkkuten-net, za wər isəmməttəy anafran-net.

³⁰ Kawanay iman-nawan dat awa təmmizrayam Məššina mišan əmərədda ihanattat-awan s əssəbab ən təmazrəyt-nasan.

³¹ Zund əmmək en daɣ as, dad zamas təmazrəyt-nasan ta n əmərədda teway-du as təgrawam əhənətta, arət wədi iga fəl a dasan-ihənəttət Məššina əntanay da [əməərədda].

³² Fəlas Məššina ittâf aytedan kul daɣ təmazrəyt fəl a tan-assaknu ketnasan təhanint-net.

Təmmalen i Məššina fəl masnat-net

³³ Ya Məššina! Təgərgist-nak, əd tayttay-nak əd masnat-nak wər əlenat əddukad. Ēlxəkuman-nak wər t-illa i ifragan əsəggər-nasan, tarrayen-nak wər t-illa i ifragan əgərri-nasnat.

³⁴ «*Məni wa issanan awa daɣ isamadran Ēməli? Məni was kala ad iqqal əməššewwər-net?*

³⁵ *Məni was kala ad iga i Məşşina tənəfust, əngəm iqqəl as irwâs-tu tənəfust?»*

³⁶ Arat kul ənta a d-ifal, ənta a d-ewayan as t-imal arat kul, ənta dəx a ilan arat kul. Igrəwet Məşşina adkul dəx azzaman kul har faw! Amin.

Əzəmmizəl n Əlinjil: Awa dər tətalu təməddurt n əlməsixi

12

Ammar s iga ən təməddurt ta n əlməsixi

Təməddurt təmmittayat fəl ta tərəwat

¹ Dəx adi əgmâya dəx-wan, ya imədrayan-in, fəl tişit ta iga Məşşina əməhhenən, ad tak-fim şixəswen-nawan əqqəlnat takutay təddarat, zəddigat, təgrâzat i Məşşina. Emmək en dəx as za tagim i Məşşina əlxibada wa n tidət.

² Ad wər tayyim iman-nawan səmməttəyan-kawan azzaman win nəha da əmərədda, kalar ayyiwat iman-nawan a kawan-təşəşşinəy tayttay-nawan ta taynayət, fəl ad tagrim, tardim dəx s arat wa imosan tara ən Məşşina, a t-imosan: Awa olağan, d awa igrazan i Məşşina, d awa ikmalan.

Agiwat təməddurt âs akkiyyan dəx-wan imos amaşşaxal ən win hadatnen, təşyəlam əs təhəkkuten ən Məşşina

³ Arat da wa ganna y akkiyyan dəx-wan s əssəbab n arraxmat ta di-iga Məşşina: Ad wər təqqəlam aytedan əzzizwarnen iman-nasan, kalar agiwat i man-nawan iduf igân s ənnəyat

tolaḡât, ewâl awen s əzəgzan wa ikfa Məşşina y akkiyyan daḡ-wan.

⁴ Akkiyyan daḡ-na taḡəssa iyyadda a ila, mišan təga daḡ təsəllad aggotnen, amaran šisəllad šin den akkiyyat d əşşəḡəl-net.

⁵ Emmək en daḡ as nakkanay nəggət, mišan taḡəssa iyyadda a nəmos daḡ tərtəyt d Əlməsix, amaran akkiyyan daḡ-na imôs taslət daḡ əljəməḡat-nana.

⁶ Mišan nəgrâw šihəkkuten wər nola ewal-nen s arraxmat ta tətawakfat akkiyyan daḡ-na. As imos as igraw iyyan daḡ-na təhəkkut n emel y aytedan isalan a fall-as d-izazabbat Məşşina, išşəşəḡəlet-tat ewâl awen s awa dər ogda əzəgzan-net.

⁷ Was təhəkkut-net tadhəlt n aytedan, idhəlet-tan. Wa igrawan təhəkkut n əsəssəḡri, is-sassaḡriwet.

⁸ Wa igrawan tišit n awedan italaman y aytedan fəl man, amazalet s awen. Wa igrawan tišit n awedan təha tahakkay, akfet s əwəl iyyanda. Wa igrawan tizart agiwet tizart n əlməxsud. Wa itassanan daḡ aytedan win məḡatarnen, issənet daḡ-san əs man filawasnen.

Agiwat təməddurt taha tara d əsəmmədrəy ən man əd tugəyt s a imosan təkma

⁹ Tara a tat-wər-təggəz təlmənufəqa. Əkəydat arat kul wa imosan təkma. Zəzzəwətət wəllen daḡ əmazal n awa olaḡan.

¹⁰ Daḡ batu ta təqqalat tara ta gər mədrayan, akkiyyan daḡ-wan akniwet tara ən win hadat-nen.

Daḡ batu ta təqqalat saḡmar,

zuzərat tənfa ta n mədrayan-nawan i ta-nawan.

¹¹ Dağ batu ta təqqalat əşşəxəl,
əqqəlat imaşşaxalan, wərgex iməssəndad,
təməhəndəret dağ-wan tamse ta tətakkasat san-
dad,

a tat-imosan ta n Infas ən Məşşina,
təxbədam Əməli.

¹² Dağ batu ta təqqalat igi n attama, fəliwəsət.
Dağ batu ta təqqalat təssust, əqqəlat
iməzəzzəydar.

Dağ batu ta təqqalat şiwatriwen,
ad wər tamməzzayam d igi-nasnət.

¹³ Dahhalat imizdagan dağ addararaten-nasan,
təqqəlam aytedan iha amagaru fawda.

¹⁴ Tattarat a igan albaraka y aytedan win
[kawan]-ədgaznen. Ad wər tələxhanam awedan
waliyyan, kalar tattarat y aytedan.

¹⁵ As təggəzam aytedan filawasnen,
təfəliwəsəm kawanay da, as təggəzam win
hallinen, talim kawanay da.

¹⁶ Nəməggiwat iduf iyyanda gar-ewwan. Ad
wər təgəmməyam almaqam i man-nawan, kalar
gəmməyat awa wər nələ anay. Ad wər tagim iduf
n as təmosəm imalan ən tayttay.

¹⁷ Ad wər təzzalam təkma əs təkma y awedan
waliyyan. Gəmməyat awa olağan xur aytedan
kul, a sər-əs tətəməzalam.

¹⁸ As immikkan awen, iket iqqan dağ-wan adi,
iməlet-tu alxer gar-ewwan d awedan kul.

¹⁹ Ad wər təzəzalam i man-nawan, imaran-in,
kalar ayyiwat alham wa n Məşşina ad işxəl, fəlas
ənnan Əlkəttaban: «*Nak a itabazan s əşşəriya,*

nak a z'ixkəman y awedan kul awa dər ihor; inna Īməli.»

²⁰ Kawanay amaran arat da wa kawan-iwaran: «*As tənayaχ azangaw-nak ih-ay gələk, taššatšaqqu; as t-ihā fad deχ taššašwaq-qu; fəlas as das-təgeχ adi, zun as təssinsa fəl aχaf-net šimakaten əryānen.»*

²¹ A dak-wər-ilkəm ad toyyeχ əššur issəfəl-du dənnəg-ək, kalar əχləb əššur s əmazal n awa olaχan.

13

Īqqəlat kəl akal olāχnen

¹ Awedan kul ilzām-tu əbərdəg i muzaran n akal fəlas taχmar kul Məššina a du-təfal. Taχmaren kul šin t-əllanen, Məššina a tanat-issəbdadan.

² Awen day a fəlas awedan kul wa iffəllagan fəl əlxəkum n akal-net, awedan wədi ənnizam ən Məššina a fəl iffəllag. Win əffəllagnen deχ a d-awəyan attadib əs man-nasan.

³ Imuzaran wər tan-iksud awedan wa itaggin awa olaχan, kalar wər tan-iksud ar wa itaggin təkma. As tareχ a kay-təgməd tasa ən muzaran ad tətamazalaχ awa olaχan, əddi a χur-san təgrəwaχ əlqəbulat.

⁴ Fəlas imuzaran n akal əššəχəl ən Məššina a əhan imosan tənfa-nak. Mišan as tətəggəχ awa wər noləχ, wədi iksad imuzaran fəlas wərgəχ bannan əlân fərregat n attadib əs təmattant. Məššina a iššəšχalan imuzaran fəl ad tawaddaban aytedan win tamazalnen təkma, ewayan-du əs man-nasan alham n Īməli.

⁵ Awen daɣ a fəlas təga addararat s ad ab-bardagan aytedan i muzaran. Wərgəɣ təksəda n attadib ɣas a fəl danaɣ-ilzam awen, kalar ənnəyat-nanaɣ a dana-tu-təzzəlzamat.

⁶ Əddəlil n awen daɣ a fəl tərəzzamam amana fəlas win tu-garrawnen den Məşşina a tan-işşəşɣalan fəl ad sənnəhəlan amaknaw n əşşəɣəl wen.

⁷ Ərzəmat y awedan kul awa daɣ-wan ila. Ərzəmat amana i wa daɣ-wan t-ilan, tərzəmam takəs i wa daɣ-wan tat-iran, tiksadam was kawan-təwar təksəda-net, təssəɣməram was kawan-iwar saɣmar-net.

Tara n əşşəqqay-nak, ənta a təmosat əsəkməl ən ləkkum y əşşəriɣa

⁸ A tu-wər-iməl waliyyan daɣ-wan itiwar-wasan arat a iqqal. A tu-wər-iməl gar-ewwan ar ənəmərə, id awedan wa iran aytedan, wədi issinda-du əşşəriɣa ən Məşşina.

⁹ Fəlas alwajiban zun win ənnanen: «*Ad wər tagay əzzəna, wala tagay iman, wala takəra, wala tagay attama-nak day ares n awedan*», d alwajiban kul win hadatnen, əxsəlan-du daɣ alwajib iyyanda, wa innan: «*Agu y əşşəqqay-nak tara ta təgey i man-nak.*»

¹⁰ Awedan irān əşşəqqay-net wər ilkem a das-iga təkma waliyyat. Daɣ adi tara, təssinda-du əşşəriɣa.

Agiwat təməddurt a day təhām ənnur fəlas tewaylay n Əməli təhōz

¹¹ Daɣ adi, alwaq ewad-du əmərədda wa daq-qawan iwar ad tənkeram daɣ etəs, fəlas efsan

ogar ihəz wa dana-d-əgan əməərədda i wa dana-d-əgan assaxa wa du-nəzzəgzan.

¹² Ehad iglâ, ezal ihoz-du. Mazzayatana day adi əd mazalan win šiyyay. Ettəfatana təzoli ta n ənnur.

¹³ Şikəlatana day əzzəbun, zun as nəjiwankat ezal a mallan. Ad wər nəsasakay day tattay wala tessay n esmad. Ad wər nətaggu əzzəna əd mazalan zizallatnen aggadəm, nənəməggəg əd təmazaxən əd manzax.

¹⁴ Kalar təqqəlet təbdoq-nawan alxal wa n Ēməli Ƴaysa Ēlməsix. Ad wər tayyim tarrayt waliyyat y arak deranan win aggadəm annadin day-wan.

14

Tara d ənəmənnak gər aytedan win ədrawnen əzəgzan

Ad wər təxakkamay y aytedan win dər tədrawax əzəgzan

¹ Qəbbalat aytedan win as irkam əzəgzan-nasan. A dər-san wər tətamazaxam day batu n idufan-nasan.

² Awedan iyyan iga iduf n âs təxalal-as tattay n arat kul. Iyyan as irkam əzəgzan-net wər das-xalal âr tettay n annabatan win fərgan.

³ Wa itattin amensay, ad wər alku wa tu-wər-nətəttu. Wa wər nətəttu amensay dəx ad wər issəwər lahan i wa t-itattin fəlas ənta da iqbâl-tu Məşşina.

⁴ Ma təmosax as təxakkama y əkli ən wiyyad? Gər ibdâd wala uda, da məşşis a təqqal batu ten.

Mişan wər z'udu, kalar ad ibdəd, fəlas Əməli ila fərregat n akabal-net.

⁵ Awedan iyyan iga iduf n as əzəl iyyan ogar ijilan win hadatnen, iyyan iga iduf n as ijilan kul olân ogdân. Awedan kul iwâr-tu ikus n aššak dağ iduf wa iga.

⁶ Awedan wa izlayan ijilan, Əməli a fəl iga awen. Wa itattin amensay was ira değ Əməli a fəl iga awen, fəlas iggoday i Məššina amensay wa itattu. Wa issəban fəl man-net imensewan wiyyad değ Əməli a fəl iga awen id ənta da iggoday i Məššina.

⁷ Əssənat as wər danağ-ihə i iddaran fəl əddəlil ən man-net wala değ i itiba fəl əddəlil ən man-net,

⁸ fəlas as nəddâr, wədi Əməli a fəl nəddar, as danağ-aba değ Əməli a fəl danağ-aba. Gər za nəddar wala değ ab-ana, Əməli a danağ-ilan.

⁹ Fəlas Əlməsix aba-tu, iqqal-du təməddurt fəl ad iqqəl Əməli ən win aba əd win əddarnen.

¹⁰ Amaran kay, mafel təxakkama y amadray-nak madeğ tolkeq-qu? Awak wərgex ket-nana kundaba nəbdad dat adag n əšşəriğa ən Məššina?

¹¹ Fəlas ənnan Əlkəttaban: «*Inna Məššina: "Nak əddâra, i d-ixlâkan kul kundaba issəjad dat-i, iləs değ kul kundaba iga təmmalen i Məššina."*»

¹² Əmmək en dağ as akkiyyan dağ-na kundaba ibdad fəl mazalan-net [dat Məššina].

Ədgəz dağ awa infan aytedan win dər tədraway əzəgzan

¹³ Dağ adi mazzayatana d ad nəxakkam imidawan-nana. Kalar akkiyyan dağ-wan

idgəzet daɣ ad inkəd y arat a z'isənnəgərtəffətan əmidi-net madəɣ aggadl-ay daɣ alxata.

¹⁴ Əssânaɣ, amaran əkkasaɣ aššak daɣ esəm n Əməli Ƴaysa as wər t-illa arat xaraman. Mišan as iga awedan iduf n as xaram fall-as arat iyyan, wədi a fall-as ixram.

¹⁵ As imos as təɣšâda iman n amadray-nak daɣ batu n amensay, wədi kay wər təššokala daɣ tara. Ad wər-təhləka imədrayan-nak daɣ əzəgzan daɣ batu ən mensewan fəlas Əlməsix iman-net as t-aba fəl əddəlil-nasan.

¹⁶ Daɣ adi ad wər itəwənnu ark arat s aratan win as təgam iduf n âs olâɣan.

¹⁷ Fəlas Taymar ta n Məššina wər təmos tettay wala tessay. Kalar taqqat a təmos d alxer əd təfalawist əs tarrayt n İnfas wa Zəddigan.

¹⁸ Wa iɣbadan Əlməsix s əmmək wədi, ad igrəz i Məššina igrəw deɣ ətəwəsəɣmar ɣur aytedan.

¹⁹ Daɣ adi gammayatana wəllen aratan win du-tawaynen alxer əd win dana-z-ilalnen s ad issuhət əzəgzan-nana ketnana.

²⁰ Ad wər təjəbbərəjjəɣ əššəɣəl ən Məššina fəl batu ən mensewan. Tidət as amensay kul təxalal tattay-net, mišan təxaram tattay n amensay a du-za-tawəyat ad inəgərtəttəf awedan iyyan daɣ əzəgzan-net.

²¹ Olâɣ ad ayyu awedan tettay ən şan, ayyu tessay n esmad n alɣanab, ammazzay d arat kul wa z'arzin əzəgzan n amadray-net.

²² Iduf wa daɣ təkkasaɣ aššak daɣ əwəl-nak, wədi ag-ay gar-ek əd Məššina. İbbilal wa ikkasan aššak as wər t-obez əššəriɣa s arat was iga iduf n âs ənta a oɣadan!

²³ Mišan awedan wa igan aššak day awa itattu, wədi ibâz-tu əššərixa id awa itaggu wər inamannak d əzəgzan-net. Amaran arat kul wa wər nənammannak d əzəgzan-nak wədi abakkad.

15

Ēdgəz day tədhəlt n aytedan win dər tədraway əzəgzan

¹ Nakkanay as issohat əzəgzan-nanay təwâr-ana zəmmerat i win as wər issohat əzəgzan-nasan, nayyu agamay n arat wa ərən man-nana.

² Akkiyyan day-na iwar-tu ad igammay d ad igrəz y aytedan win dər idraw əzəgzan day anamod n awa olağan imos awen agamay n awa tan-z-iššitin.

³ Fəlas Īlməsix da wər igmay awa das-igrazan, kalar ənnan Īlkəttaban: «*Īrrəbdan win dak-tawagginen əqqalan fall-i.*»

⁴ Amaran aratan win ənnan Īlkəttaban dāt əzəl, kul tiwaktaban fəl ad nəgrəw attama wa itawayan əs tarrayt ən zəmmerat əd təsasmit ən wallan-nana šin danağ-əhakkin Īlkəttaban.

⁵ Ēgmâya day Məššina s ənta a du-təfal zəmmerat d allam fəl man a kawan-akfu tēməddurt a day tənimardam gar-ewwan day təl-kâmam y almasal n Īlməsix Ƴaysa.

⁶ Ēmmək en day as za tagim təmmalen ən tanaya ən Məššina di n Abba n Īməli-nana Ƴaysa Īlməsix, təgâm awen s ənəmənnak ən wallan d əməsli iyyanda.

Tinəməqbilat gar-ewwan zund əmmək âs Īlməsix osâ-du fəl əddəlil ən Kəl-Īlyəhud d aytedan win tan-wər-nəmos

⁷ Tinəməqbilat gar-ewwan zund əmmək as kawan-iqbal Əlməsix, tagim awen fəl saɣmar ən tanaya ən Məşşina.

⁸ Illikan as Əlməsix iqqal amaşşaxal ən Kəl-Əlyəhud fəl ad isattaddu arkawalan win iga Məşşina y aljadan-nasan, assaknu s awen as Məşşina tidət a imos.

⁹ Osâ-du əntada fəl ad igrəw Məşşina təmmalen ən tanaya-net ɣur aytedan win wər nəmos Kəl-Əlyəhud fəl əddəlil ən təhanint-net, zun awa ihan Əlkəttaban, as ənnan: «*Awen day a fəl kay-z-əməla day aytedan wər nəmos Kəl-Əlyəhud, aɣay şigaytalen ən saɣmar-nak.*»

¹⁰ Ənnan deɣ Əlkəttaban: «*Tawşeten şin wər nəmos Kəl-Əlyəhud, aɣimat təfalawist ta təga tamattay ən Məşşina.*»

¹¹ Ənnân deɣ: «*Aɣimat təmmalen y Əməli ketnakmat tawşeten şin wər nəmos Kəl-Əlyəhud, şimattiwen kul əməlnatet-tu!*»

¹² Ənnəbi Isayas da innâ: «*Ahaya ən Yasay a d-asu, ibdəd ixkəm fəl tawşeten şin wər nəmos Kəl-Əlyəhud, amaran ketnasnat a day-as aɣinat attama-nasnat.*»

¹³ Əgmâya day Məşşina s ənta a ɣur d-iffal attama ketnet a kawan-akfu təfalawist d alxer əkmâlneŋ əs tarrayt n əzəgzan-nawan fəl ad təsənnəhəlam aɣaraw n attama əs tarna n Infas wa Zəddigan.

Təsəxtəmt

Əşşəxəl wa iwaran Buləs əd şikilan win as otas igi-nasan

Əşşəxəl wa iwaran Buləs day batu n aytedan win wər nəmos Kəl-Əlyəhud

14 Dağ batu ta kawan-təqqalat kawanay, nak iman-in əkkasağ aşşak imədrayan-in, as təknâm əllux təknâm agaraw ən masnat, təfrâgam ad tətınəməsəsəxrim gar-ewwan.

15 Dər iga awen da ya, kud ira annay əktabağ-awan-in əs taholat, fəl a kawan-d-asakta, əs tarrayt n arraxmat ta di-iga Məşşina, arat əs kala da təssanam dağ-as.

16 Arraxmat ten təmos as di-iga amaşşayal n Əlməsix Ƴaysa dağ aytedan win wər nəmos Kəl-Əlyəhud. Taggağ əşşəxəl zəddigan s amel wa taggağ Əlinjil ən Məşşina. Awen əgêq-qu fəl ad əqqəlan aytedan win wər nəmos Kəl Əlyəhud takutay təgrâzat i Məşşina, təmosat arat a dər inihagga əs tarrayt n Infas wa Zəddigan.

17 Dağ adi ələx s ad səbbərəğa dağ tassağ n Əlməsix Ƴaysa dağ batu n əşşəxəl wa əgeğ i Məşşina.

18 Wər əheləğ awal dağ aratan ar win issənda Əlməsix əs tarrayt-in əmosnen as d-ewayəğ aytedan win wər nəmos Kəl-Əlyəhud s əbərdəğ i Məşşina. Arat wen iga s awal əd mazalan,

19 igâ değ əs tarna ən təlməxjujaten əmosnen aɣalamaten, d aratan simaklalten, əgânen əs tarrayt ən tarna n Infas ən Məşşina. Emmək en dağ as a d-obazan ɣur Yerusalam harkid Əlurəya, akal wədi kul sinahaləğ dağ-as emel ən salan n Əlinjil n Əlməsix.

20 Amaran əşşəxəl-in wa dağ ədgaza wəllen imos emel n Əlinjil y aytedan win âs wər kala ad əslan y esəm n Əlməsix. Arat wen əgeq-qu fəl ad wər iqqəl əşşəxəl-in arat intân fəl əşşəxəl n iyyan awedan.

21 Ǝššəxəl wen əgeq-qu s əmmək wa əmalan Ǝlkəttaban as ənnan: «*Win as wər ittəmal ad t-ənəyan, amaran win wər nəsla isalan-net a tan-aslin agrin-tan.*»

Işikilan win otas Buləs

22 Arat wa daɣ a di-igaddalan fawda a kawan-in-asa.

23 Mišan əmərədda əɣradaɣ əššəxəl-in daɣ kallan win den. A ilan elan ad əknəx tara n a kawan-in-azzayyara,

24 amaran arex igi n adi assaɣa wa din-z-asax Esbanəya. Fəlas əgeɣ attama n a kawan-ənəyaɣ as din-əmmaraɣ əddi, amaran əffilla fall-awan y a di-tilalam s iki n akal wen dəffər as ɣur-wan əgeɣ azzaman.

25 Ǝməərədda ad akka Yerusalām y ad əšxələɣ i tamattay ən Məššina ta təllat den.

26 Fəlas Ǝlkənīsaten šin Masedonəya d Akayya əknānat tara n igi ən širgiten fəl ad ədhəlmat šiləqqawen əhanen imizdagan win Yerusalām.

27 Ǝlkənīsaten šin əknānat tara n awen, amaran iwār-tanat igi-net, fəlas dad zamas əlməsixitan win əmosnen Kəl-Ǝlyəhud ədhālan win wər nəmos Kəl Ǝlyəhud fəl aganna wa n əzəgzan-nasan, wədi əlməsixitan win wər nəmos Kəl Ǝlyəhud iwār-tan əntanay da ad ədhəlman s ərrəzəɣan-nasan win əmosnen Kəl Ǝlyəhud.

28 Daɣ adi as əɣradaɣ əššəxəl wa, šaššawada širgiten šin i məssawəsnat, ad akkaɣ Esbanəya əmməraq-qawan-in.

29 Amaran əssānaɣ as albaraka ikmālan n Ǝlməsix a imos asa wa kawan-in-z-aga.

*Agamay ən Buləs šiwatriwen ən məzzəgzan s
İlməsix*

³⁰ Ya imədrayan-in, əgmaya dağ-wan wəllen əs tarrayt n Əməli-nana Үaysa İlməsix əd tara ta ihakku İnfəs wa Zəddigan a di-tilalam dağ təbəllant ta əgeç s a di-tətansayam Məşşina dağ təwatriwen-nawan.

³¹ Tattarat-in a di-içlasan dağ aytedan win ugaynen s əbərdəg i Məşşina əhanen Yahudəyya, tətərəm-i deç a fəl əqbalan mizdagan win Yerusalam şirgiten şin dasanz-awəya.

³² As iga adi a kawan-in-asa əkneç təfalawist, kud ira Məşşina adi, aga çur-wan azzaman ən təsanfawt.

³³ Əgmâya dağ Məşşina a ihakkin alxer a kawan-agəz ketnawan. Amin!

16

Assalaman d ənnəsixatan əd təwatriwen

¹ Əssiflasaq-qawan təmadrayt-nana Fəbay təmosat təmadhalt n Əlkənisat ta n Qankrəya

² fəl a tat-təqbəlam s esəm n Əməli, igâ awen s əmmək wa dər əhoran mizdagan. İlalət-as dağ arat kul wa dağ təddərar tilalt-nawan fəlas ənta da təllil y aytedan aggotnen as nak iman-in aheçqan.

³ Təhulam-in Fıriska d Akilas əmosnen imidawan-in dağ əşşəçəl y İlməsix Үaysa.

⁴ Əntanay a əganen iman-nasan dağ alyarar ən tamattant fəl a di-agəzan dağ win əranen tenaçay-nin. Wərgəç nak ças a dasan-iggodayan

awen. Kalar Īlkənisaten kul šin aytedan win wər nəmos Kəl-Īlyəhud, da əggodaynat-asan.

⁵ Təhulam-in deḡ Īlkənisat ta təhat aḡaywan-nasan.

Təhulam-in əməri-nin Efaynet s ənta a az-zaran əzəgzan s Īlməsix daḡ akal n Asəya.

⁶ Təhulam-in Maryama təyyəwanat əššəḡəl aggen imosan tilalt y-awan.

⁷ Təhulam-in Andronikus əd Yunəya, əmosnen kəl tamet-in a dər nimaggaza kasaw, əmosan deḡ aytedan a fəl təga masnat daḡ nəmmuzal amaran azzaran-i əzəgzan s Īlməsix.

⁸ Təhulam-in deḡ Anfłəyatus əkneḡ tara fəl tərtəyt a nəga daḡ əzəgzan s Īlməsix.

⁹ Təhulam-in Urbanus imosan əmidi-nana daḡ əššəḡəl y Īlməsix, təhulam-in deḡ əməri-nin Īstaḡus.

¹⁰ Təhulam-in Abalus imosan awedan isitad-dan əzəgzan-net s Īlməsix. Təhulam-in deḡ kəl aḡaywan n Aristabul.

¹¹ Təhulam-in Herodəyon s ənta da iyyan daḡ kəl tamet-in. Təhulam-in kəl aḡaywan ən Narsisos win əzzəgzannen s Īlməsix.

¹² Təhulam-in Trifina əd Trifoza əgānen əššəḡəl aggen daḡ tarrayt n Īməli. Təhulam-in təmərit-nana Fərsida təgāt əntada əššəḡəl aggen daḡ tarrayt n Īməli.

¹³ Təhulam-in Rufus imosan anafron ən Məššina d anna-net as nak da təmos-i zun anna.

¹⁴ Təhulam-in Asinkrit əd Flegon əd Ƴermes, əd Fatrobas əd Ƴermas əd mədrayan-nana win ḡur-san əllanen.

15 Təhulam-in Filologos əd Yuləya, əd Neray əd tamadrəyt-net, əntanay harkid Olinbas əd məzzəgzan kul win çur-san əllanen.

16 Tinəməggat assalam zəddigan. Əhulnat-kawan-in Əlkənisaten n Əlməsix ketnasnat.

Ənnəsixa wa ilkaman

17 Ya imədrayan-in, əgmâya daç-wan ad tənkedam y aytedan win dutawaynen iməzzəyan gar-ewwan əd təsənkaf sikarakadnen əmosnen əllid n əsəssəçri wa tətawəggam. Nəməggəgat d aytedan win di

18 fəlas wər əçbedan Əməli-nanaç Əlməsix, kalar wər gəmməyan ar a əgan daç tədusen-nasan. Awan-nasan hossaynen əd şizada n iləs-nasan as takarrasan aytedan win wər nəla arak man.

19 Əbərdəç-nawan i Məşşina awedan kul issân daç-as, adi a fəl as isifalawas-i awen daç batunawan. Mişan areç ad tilem tayttay daç batu ta təçqalat əmazal n awa olaçan, tizdagam deç daç i tu-təlla talbast.

20 Məşşina s ənta a d-iffal alxer kul, tar-mad as z'addagdag Aşşaytan daw daran-nawan. Tidawet dər-wan arraxmat n Əməli-nana çaysa.

21 Ihul-kawan-in əmidi-nin daç əşşəçəl a t-imosan Timotay ənta harkid Luçəyus əd Yason əd Sosifater əmosnen kəl tamet-in.

22 Nak iman-in Tertəyus a itawasaktaban şirawt ta, da əhulaç-qawan s esəm n Əməli.

23 Ihul-kawan-in Gayəs s ənta a çur əssəçana nak d Əlkənisat ketnet. Ihul-kawan-in Erastus imosan aləs wa innəttafan d ərrəzəçan n əçrəm wa, ihul-kawan-in deç amadrəy-nana Kartus.

²⁴ [Tidawet dər-wan arraxmat n Əməli-nana
Yaysa Əlməsix ketnawan! Amin!]

²⁵ Təmmalen i Məşşina s ənta a ilan tarna n ad
isəssuhət əzəgzan-nawan dəx anamod iniman-
nakan d Əlinjil-net wa əmala imos təlxtubat ta
əge dəx batu ən Yaysa Əlməsix. Inimannak dəx
awen d əssir ən Məşşina wa danax-inafalalan.
Əssir wen, ixbâr dəx azzaman win okaynen.

²⁶ Mişan əmərəddə sannafalalan-tu
Əlkəttaban win d-əzzəbbatnen fəl ənnəbitan.
Məşşina di n Amaxlol a omaran s ad inəfiləl
awen i tawşeten n əddənet ketnasnat fəl a
sər-əs əzzəgzənat abbardagnat-as.

²⁷ Məşşina ənta məşşis ən masnat kul! Tanaya
kul şin-net. Attamalet har faw, əs tarrayt ən
Yaysa Əlməsix! Amin!

**Ēlinjil ən Ȳaysa Ēlməsix Itawann-as dex
Arkawal wa Aynayan
Tamajaq, Tawallammat: Ēlinjil ən Ȳaysa Ēlməsix
Itawann-as dex Arkawal wa Aynayan New Testament
Le Nouveau Testament en tamajaq tawallammat,
écriture latine**

copyright © 2015 Wycliffe Bible Translators, Inc.

Language: Tamajaq, Tawallammat

Contributor: SIM International

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

3aaeb7b2-4a3b-51fe-8c2d-ed8c05d4be0f